

TUTÚ DÍHNA NUU NĬ CADÚHA TÉ PĀBLÚ QUIHĬⁿ NDAHA ÑÁYIU ÑUÚ CÒRINTÚ

*Té Pāblú cādūha-dé tutú quihĬⁿ ndaha ñáyi
xĭndecu ichi Xítóhó Jesucrístú ndécú ñùú Còrintú*

¹ Yúhú té Pāblú ní cáháⁿ ñáhá Yă Ndiöxí xii-í cuendá sá cáháⁿ-í tnúhu Xítóhó Jesucrístú núú ñáyi, chi ducaⁿ ñ cachí Yă Ndiöxí cunduu. Te cādúha-í tutú-a ndihĭ té Söstenés té ndecu ndihĭ-o ichi Xítóhó Jesucrístú

² cuendá daquixi-í ndaha nchòhó ñáyi xĭndecu ichi Yă Ndiöxí ndécú ñùú Còrintú, chi nchòhó cúú-ndó ñáyi cùu cuendá Yă Ndiöxí cuendá sá ndécú ndihĭ-ndo Xítóhó Jesucrístú. Te ñu-ni-ndo cùu-ndo ñáyi ní cáháⁿ ñáhá Yă Ndiöxí cuendá cundecu yĭñuhu-ndo núú-gă, ndihĭ nchaa dava-gă ñáyi ndecu nchaa xichi, ñáyi cächí sá ĩo cāhnu cuu Xítóhó Jesucrístú. Te Yaá-áⁿ cúú-gă Xítóhó-yu, te ñu-ni-gă cúú-gă Xítóhó nchoo tucu.

³ Te xicáⁿ táhù-í núú Tātá-ó Dütú Ndiöxí ndihĭ núú Xítóhó Jesucrístú sá ndi nduú-gă ĩo na chĭndee chitúu ñaha-gă xii-ndo, te ĩo váha cuu iní-ndó cūndecu-ndo.

Yă Ndiöxí ĩo chĭndee ñaha-gă xii-o cuendá sá ndécú-ó ndihĭ Xítóhó Jesucrístú

⁴ Te ducaⁿ-ni ĩo ndàcáⁿ táhù-í núú Yă Ndiöxí cuendá-ndó, chi mee-gă ĩo chĭndee chitúu ñaha-gă xii-ndo să cuendá Xítóhó Jesucrístú.

⁵ Te cuendá sá ndécú-ndó ndìhi Xítóhó Jesucrìstú, núu xíáⁿ Yă Ndiöxí ío chindee ñaha-gá xii-ndo sáa díquí-ndó nàcuáa cáháⁿ-ndó, ndìhi nàcuáa cùtnuní iní-ndó,

⁶ chi tnúhu sá ni ñhí-ndó cuendá Xítóhó Jesucrìstú ní quée-xi iní-ndó.

⁷ Te xíáⁿ núu nchaa sá văha ñá túú tnàhí cùmání xii-ndo chi Yă Ndiöxí ío chindee ñaha-gá. Te ducaⁿ quide-gá ñini nchòhó ñi yùhu ñi iní-ndó ndètu-ndo sáa nduu quixi tucu Xítóhó Jesucrìstú.

⁸ Te Yă Ndiöxí ducaⁿ-ni ío chindee ñaha-gá xii-ndo cuendá sá vă yôo teñaha cuèchi nduu na quixi tucu Xítóhó Jesucrìstú.

⁹ Te nchaa sá cáháⁿ Yă Ndiöxí dacuití quide-gá, te diu-gá cúú-gă Yaá ní cáháⁿ ñáhá xii-ndo cuendá cuu ñⁿnuu-ndo ndìhi Déhe-gá Xítóhó Jesucrìstú Yaá cúú Xítóhó-ó.

Ñá túú cùu ñⁿnuu ñáyiu ndècu ichi Xítóhó Jesucrìstú

¹⁰ Te nchòhó ñáyiu ndècu ndìhi-í ichi Xítóhó Jesucrìstú cáháⁿ-í dóho-ndo să vă ndì dííⁿ càni iní-ndó, te ío cuu ñⁿnuu-ndo cùndecu-ndo, te ñⁿ-ni càni iní-ndó, te ñⁿ-ni càda-ndo chi ducaⁿ cuiní-gá cundu.

¹¹ Te duha cáháⁿ-í dóho nchòhó ñáyiu ndècu ndìhi-í ichi Xítóhó Jesucrìstú, chi cue ñáyiu vehe té Clòé ní cachí tnúhu-yu xii-í sá ñà túú cùu ñⁿnuu-ndo ndecu-ndo.

¹² Te duha ndùu tnúhu ní níhì-í nàcuáa cùu ndecu-ndo, chi dava-ndo càchí-ndó: “Yúhú cúu-í cuendá té Păblú.” Te dava-ndo càchí-ndó: “Yúhú cúu-í cuendá té Àpolós.” Te dava-ndo càchí-ndó: “Yúhú cúu-í cuendá té Pèlú.” Te dava tucu-ndo

càchí-ndó: “Yúhú cùú-í cuèndá Xítóhó Jesucrìstú”, duha càchí-ndó.

¹³ Te vá dúcáⁿ cǎháⁿ-ndó chi ñá túú nǎ daha Xítóhó Jesucrìstú ndécú chi ìⁿdii-ni-gá. Te ñá díú yǔhú té Pǎblú ní xǐhí-í núú cùrúxí sá cuèndá-ndó, te ní ñà túú ní sàndute-ndo cuendá sá yǔhú cuu cuèndá ñáhà-í xii-ndo.

¹⁴ Te táxǎhu xii Yá Ndiǒxí chi ñá díú nchàa-ndo ní dacuandute-í, chi té Crìspú-ni ndìhi té Gǎyú-ni ní dǎcuándute-í-güedé.

¹⁵ Te xǐǎⁿ nǔu vá cúú tnàhí cǎháⁿ-ndó sǎ ñǎ sǎndute-ndo sǎ cúú cuèndá ñáhà-í xii-ndo.

¹⁶ Te ní ndacu tucu iní-í sá tnàhá tucu ñáyiu cùu ndì mee té Èstéfanás ní dǎcuándute-í, te ñu-ná ñáyiu-áⁿ te sǎnuu sá ñà túú-gǎ nágá ñáyiu ní dǎcuandute-í.

¹⁷ Te Xítóhó Jesucrìstú ñá túú ní tëndaha ñaha-gá xii-í sá dǎcuándute-í ñáyiu, chi ní tendaha ñaha-gá xii-í sá cǎháⁿ-í tnúhu-gá núǔ-yu, tnúhu sá cǎháⁿ nàcuáa naníhí tàhú-ó. Te ñá túú cǎháⁿ-í dàtná cǎháⁿ ñáyiu túha. Te ducaⁿ quìde-í cuèndá sá nchòhó quíndáá váha iní-ndó tnúhu sá cǎháⁿ nàcuáa ní xǐhí Xítóhó Jesucrìstú núú cùrúxí. Chi núu na cǎháⁿ-í dàtná cǎháⁿ ñáyiu túha te nchòhó vá quíndáá iní-ndó tnúhu-áⁿ nàcuáa tàú-xi cunduu.

Sá cuèndá Xítóhó Jesucrìstú cùtnùní iní-ó sǎ ñǎ cǎhnu cuu Yá Ndiǒxí

¹⁸ Te nchaa ñáyiu ta xǐta nihnu cuáháⁿ càchí-yu sá ñà túú nàndìhi tnúhu sá cǎháⁿ nàcuáa ní xǐhí Xítóhó Jesucrìstú núú cùrúxí, dico sá cúú-xí nchòhó ñáyiu sa ní naníhí tàhú, chi tnúhu-áⁿ cúú-xí ìⁿ tnúhu sá ñǎ taxi Yá Ndiǒxí ndécú ndìhi-o cuendá ndacu-gá cada-gá nchaa nàcuáa cuìní-gá iní-ó,

19 te quèe ndáá-xi nàcuáa càháⁿ-gá núú tütú-gá núú càchí-xi:

Yúhú cada-í te nchaa ñáyiú túha vá nándíhi-gá nchaa sá xìní tnùní-yu,

te nchaa ñáyiú ío váha sàá díquí-xi vá nándíhi-gá nchaa nàcuáa sàni iní-yu.

Duha càchí Yă Ndiöxí núú tütú-gá.

20 Te xiăⁿ cùtnùní iní-ó sã ncháá ñáyiú sàni iní-xi sá ïo túha ndècu ñuyíú-a, ndíhi nchaa cue téé dàcuaha ñaha xii-yu nchaa tnúhu ní chídó tnùní ndíi Moisés, ndíhi nchaa ñáyiú ío váha sàá díquí-xi càháⁿ cuendá nchaa sá ìo ñuyíú-a, te nchaa ñáyiú-áⁿ càchí Yă Ndiöxí sá ñã túú nándíhi nchaa sá xìní tnùní-yu sá cúú-xí-gă.

21 Te Yă Ndiöxí ío váha cùtnuní iní-gá nàcuáa quide-gá, chi ñã túú dàña-gá cundecu ndíhi ñàhá-yu xii-gá sá cuendá nchaa sá ñi sáá díquí méë-yu, te ducaⁿ quide-gá chi cuiní-gá sá cùndèdóho-yu tnúhu sá sání ìni-yu ñã túú nándíhi. Te sá cuendá tnúhu-áⁿ te naníhí tàhú-yu te núu na quindáá iní ñáhã-yu xii-gá.

22 Te cue ñáyiú isràél cuiní-yu quini-yu sá vã yõ tnàhí ndàcu cada, te cue ñáyiú grìégú nchìcúⁿ nihnú-yu nchaa sá dácuàha ñáyiú ío túha.

23 Dico nchoo yìhi-o cáháⁿ-ó nűú ñáyiú sá Xìtohó Jesucristú ní xíhí-gá núú cùrúxí. Te cue ñáyiú isràél ñã túú tnàhí tnàhá iní-yu cundèdóho-yu tnúhu-áⁿ. Te cue ñáyiú ñã túú cùu ñáyiú isràél càchí-yu sá ñã túú vèdana nándíhi tnúhu-áⁿ.

24 Dico sá cúú-xí nchàa ñáyiú ní cáháⁿ ñàhá Yă Ndiöxí chi cuèi cùú-yu ñáyiú isràél àdi ñã túú

cùu-yu, dico ñáyiú-áⁿ càchí-yu sá sã cuèndá Xítóhó Jesucristú cútnùní iní-yu sá ïo càhnu cuu Yá Ndiöxí te ndècu ndihí-gá nchaa sá xìní tnùní-gá.

25 Te sá quidé Yá Ndiöxí càchí ñáyiú ñuyíú-a sá ñà túú nándíhi, dico xiáⁿ ïo-gá nándíhi dàcúúxí sã sání ìní méě-yu. Te sá ñí xíhí Xítóhó Jesucristú núú cùrúxí, xiáⁿ càchí ñáyiú sá ñã túú ní ñíhí ndéé Yá Ndiöxí cada-gá sá ñí sani iní-gá cada-gá. Dico sá dúcáⁿ ñí quide Yá Ndiöxí, xiáⁿ cúú-xí sã ïo-gá ní ñíhí ndéé-gã ní quide-gá #ⁿ sá ñí sani iní-gá dàcúúxí sã sání ìní méé ñáyiú ñuyíú-a.

26 Te nchòhó ñáyiú ndècu ndihí-í ichi Xítóhó Jesucristú, chí dándàcu iní nàcuáa ndècu-ndo cútnàhá ní cáháⁿ ñáhá Yá Ndiöxí xii-ndo, chí sacú-ni-ndo túha dàcúúxí ñáyiú ñã túú ndècu ichi-gá. Te ducaⁿ sàcú-ni-ndo tàxi tnuní-ndó, te diu-ni ducaⁿ sàcú-ndó nèhe ñáyiú sá yíñùhu núú-ndó.

27 Te ñáyiú ñã túú ndècu ichi Yá Ndiöxí càchí-yu sá ñà túú tnàhí túha dava-gá tnàha ñáyiú-yu, dico dava ñáyiú ñã túú túha-áⁿ càháⁿ ñáhá Yá Ndiöxí xií-yu cundecú-yu ichi-gá, te cundecu ndihí ñaha-gã xií-yu, te ducaⁿ dándóo canúú-yu nchaa ñáyiú càchí sá ïo túha. Te càháⁿ tucu-gá ñáyiú càchí dava-gá ñáyiú sá ñà túú tnàhí tàú cunuu cundecú-yu ichi-gá, te ducaⁿ cundecu ndihí ñaha-gá xií-yu, te dándóo canúú-yu nchaa ñáyiú càchí sá táxí tnùní.

28 Te ducaⁿ Yá Ndiöxí càháⁿ-gá ñáyiú ñã túú tnàhí cunuu cundecu ndihí-gá, ndihí ñáyiú quèe tíhú núú dàva-gá tnàha ñáyiú-xí, ndihí ñáyiú càchí-yu sá ñà túú vèdana nándíhi, nchaa ñáyiú-áⁿ càháⁿ-gá cundecu ndihí-gá, te ducaⁿ quide-gá cuèndá dándóo

canúŭ-yu nchaa ñáyiú càchí sá ïo cùnuu.

²⁹ Te núu xǎⁿ ni ñⁿ ñáyiú vá cúú càchí-yu sá ïo cànnu cuú-yu núú Yǎ Ndiǒxí.

³⁰ Dico nchòhó chi mee Yǎ Ndiǒxí ní quide-gá ndécú-ndó ndìhi Xítóhó Jesucristú, te Xítóhó Jesucristú ní quide-gá ní cutnùnì iní-ó sǎ Yǎ Ndiǒxí cúú-gǎ Yáá ndécú ndìhi nchaa sá xìnì tnùnì-gá. Te diu-ni Xítóhó Jesucristú ní quide-gá cuèndá sá nchóó vǎ cùndecu-gá cuéchi-o núú Yǎ Ndiǒxí, te ducaⁿ cùndecu yǎñuhu-o núú-gǎ, te nduu táhú-ó cùndecu-o ndìhi-gá ni caa ni quíhíⁿ.

³¹ Te sá dúcáⁿ quide-gá núu xǎⁿ xìnì ñùhu-xi cada-o nacúáa cǎháⁿ-xi núú tútú Yǎ Ndiǒxí núú cǎchí-xi: “Vá cǎchí-ndó sǎ méé-ndó ïo cànnu cuu-ndo, chi cǎchí-ndó sǎ Yáá cúú Xítóhó-ndó ïo cànnu cuu-gǎ”, duha cǎchí-xi núú tútú-gǎ.

2

Tnúhu sá cǎháⁿ nacúáa ní cuu ní xíhí Xítóhó Jesucristú núú cùrúxí

¹ Te nchòhó ñáyiú ndècu ndìhi-í ichi Xítóhó Jesucristú sa nàha-ndo sá cùtnàhá ní quixi-í ní cǎháⁿ-í tnúhu Yǎ Ndiǒxí núú-ndó, te ñǎ túbú ní cǎháⁿ-í dàtná cǎháⁿ ñⁿ ñáyiú ïo váha sàá díquí-xi, àdi datná cǎháⁿ ñⁿ ñáyiú ïo túha.

² Chi cùtnàhá ní xíndecu ndìhi ñaha-ǎ xii-ndo chi ní sani iní-í sá méé-ní cuèndá Xítóhó Jesucristú cǎháⁿ-í núú-ndó ndìhi nacúáa ní cuu ní xíhí-gá, te diu ducaⁿ ñ quide-í.

³ Te cùtnàhá ní quexìo-í núú ndécú-ndó te ni ñǎ cùtnùnì iní-í nása cada-í ní cùu, te ïo ní quiyùhú iní-í ní cǎháⁿ-í tnúhu-gá núú-ndó.

⁴ Te cùtnàhá ní cáháⁿ-í nàcuáa ndùu tnúhu Xítóhó Jesucrístú núú-ndó, te nàha-ndo sá Espíritú Yă Ndiöxí ní chindee ñàha-xi xii-í ní cáháⁿ-í tnúhu-gá núú-ndó, te tnúhu-áⁿ ñí quée-xi iní-ndó. Te ñá túú ní cáháⁿ-í ñⁿ tnúhu càhnu núú-ndó tnúhu sá cáháⁿ cue ñáyiu ío váha sàá díquí-xi.

⁵ Te ducaⁿ ñí cuu cuendá sá nchòhó quíndáá iní-ndó tnúhu Yá Ndiöxí chi ní quide-gá sá vâha sá cúú-xí iní-ndó, te ñá díú sã cuendá tnúhu sá cáháⁿ ñáyiu càchí sá ío túha ducaⁿ ñí sándáá iní-ndó tnúhu-gá.

Espíritú Yă Ndiöxí quidé-xí cùtnuní iní-ó nàcuáa sàni iní-gá

⁶ Te nchoo cáháⁿ-ó tnúhu càhnu núú ñáyiu sa ní níhí ndéé ndècu ichi Xítóhó Jesucrístú. Te tnúhu-áⁿ ñà túú cáháⁿ ñáyiu ñá túú ndècu ichi-gá, te ni cuè téé yìndaha ñaha xií-yu ñá túú cáháⁿ-güedé tnúhu-áⁿ chi cue téé-áⁿ naa-güedé.

⁷ Te tnúhu càhnu-áⁿ cúú-xí tnúhu Yá Ndiöxí, te mee-gã ní cachí-gá ndéé cùtnàhá vátá ngãva-gá ñuyíú sã ncháá ñáyiu na quíndáá iní tnúhu-áⁿ te nduu táhũ-yu cundecú-yu ndíhi-gá núú ío váha càa ndecu-gá ñí caa ñí quíhíⁿ. Te tnúhu-áⁿ ndúú yùhu-xi ni cuu.

⁸ Te ni ñⁿ cue téé yìndaha cue ñáyiu ñuyíú-a ñá túú tècú tnùní-güedé tnúhu-áⁿ, chi núu dìcò tècú tnùní-güedé tnúhu-áⁿ te vá catá càa-güedé Xítóhó Jesucrístú núú cùrúxí cahni ñaha-güedé xii-gá ní cùu. Te dïu-ni Yaá-áⁿ ío càhnu cuu-gá.

⁹ Dico ducaⁿ ñí cuu chi ní quee ndáá-xi nàcuáa cáháⁿ-xi núú tütú Yă Ndiöxí núú càchí-xi:

Yá Ndiöxí sa ní sani iní-gá nchaa nàcuáa cada-gá
sá cúu-xí cuendá nchaa ñáyiú cùu iní ñáhá
xì-gá.

Te sá ñí sani iní-gá cada-gá cúu-xí sá vátá quìní-gá
ñáyiú te ni vátá cùndèdóho-gá-yu,
te ni ñà túú tnàhí cùtnuní iní-yu nása cada-gá.
Duha càchí-xi núú tütú-gá.

¹⁰ Te mee Yá Ndiöxí ní cachí-gá sá Espiritú-gá
cada-xi te nchoo cùtnuní iní-ó nchaa nacúaa sàni
iní-gá cada-gá, núu xíáⁿ ducaⁿ tècú tnùn-ó vítna,
chi Espiritú-gá xìní-xi nchaandi túhú nàcuáa sàni
iní-gá cada-gá.

¹¹ Te ñá ííⁿ ñáyiú xìní ndáá-yu nàcuáa sàni iní ingá
ñáyiú, chi mee ñáyiú-áⁿ xìní ndáá-yu nchaa nàcuáa
sàni iní-yu. Te ducaⁿ sätnahá-xi cùu Yá Ndiöxí
chi medí-ni Espiritú-gá xìní-xi nchaa nàcuáa sàni
iní-gá.

¹² Te nchoo chi Yá Ndiöxí ní taxi-gá Espiritú-gá
ndécú ndìhi-o, te ñá díú ñùyíú-a ducaⁿ ni quèe
espíritú ní ngúndecu ndìhi-o. Te ducaⁿ ñí taxi-gá
Espiritú-gá ndécú ndìhi-o cuendá ducaⁿ cùtnuní
iní-ó nàcuáa ndùu nchaa sá vāha sá dícó ducaⁿ ñí
taxi-gá ndécú ndìhi-o.

¹³ Te cuendá nchaa sá vāha-áⁿ càháⁿ-ndí, te
càháⁿ-ndí nàcuáa dàcahu iní ñáhá Espiritú Yá
Ndiöxí xii-ndí, te ñá túú càháⁿ-ndí nàcuáa càhu
iní ñáyiú ñuyíú-a càháⁿ-yu, te ñu-ni nchaa tnúhu
dàcahu iní ñáhá Espiritú-gá xii-ndí càháⁿ-ndí,
ñu-ni nchaa xíáⁿ dánèhé-ndí nchaa ñáyiú ndècu
ndìhi tucu Espiritú-gá.

¹⁴ Te ñáyiú ñá túú ndècu ndìhi Espiritú Yá Ndiöxí
ñá túú tnàhá iní-yu nàcuáa ndùu tnúhu dàtecú

tnúhu ñaha Espiritú-gá xií-yu, te ni ñà túú tècú tnùnì-yu, te cächí-yu sá ñà túú nàndíhi-xi. Te ducaⁿ chi mee-ni nchàa ñáyi ndècu ndìhi Espiritú-gá tècú tnùnì-yu nàcuáa ndùu tnúhu-án.

¹⁵ Te cue ñáyi ducaⁿ ndècu ndìhi Espiritú Yă Ndiöxí cútñuní ndáá iní-yu ná cúú nchàa sá vâha, te vá yõo ìⁿ xìnì nchaa nàcuáa sàni iní-yu.

¹⁶ Te núú tùtú Yă Ndiöxí cächí-xi: “Vá yõo ìⁿ xìnì nàcuáa sàni iní Yă Ndiöxí, núú xíáⁿ vá yõo ìⁿ ndacu ná danèhé ñáhá xii-gá”, duha cächí-xi núú tùtú-gá. Te nchoo chi ìⁿ-ni sàni iní-ó ndìhi Xítóhó Jesucrìstú.

3

Cue téé xǐquide chiùn Yá Ndiöxí

¹ Te nchòhó ñáyi ndècu ndìhi-í ichi Xítóhó Jesucrìstú cächí tnúhu-í xii-ndo sã ñã ní ñhì-í nàcuáa cada-í cáháⁿ-í tnúhu-gá núú-ndó dàtná càháⁿ-í núú nchàa ñáyi quide nchaa nàcuáa càháⁿ Espiritú Yă Ndiöxí, chi ní cáháⁿ-í núú-ndó dàtná càháⁿ-í núú nchàa ñáyi cùnū nchaa sá cuèhé sá dúhá iní-xi, te ní quide ñaha-í xii-ndo dàtná cue ñáyi íchí ñí sándáá iní tnúhu Xítóhó Jesucrìstú, núú xíáⁿ ducaⁿ ñí cáháⁿ-í núú-ndó.

² Te ní quide ñaha-í xii-ndo dàtná ìⁿ déhe yiquìⁿ vitna sadi camá, te ñá túú ní quide ñaha-í xii-ndo dàtná cue landú sa xèxi dítá, chi ní dánèhé ñáhà-í xii-ndo ìⁿ sá ñà túú tnàhí úhú tecú tnùnì-ndó, te ñá túú ní dànèhé ñáhà-í xii-ndo ìⁿ sá xítò-í sá vã tècú tnùnì-ndó. Te quide cuendá-í sá díú-ní dùcaⁿ vá tècú tnùnì-ndó ndèé vitna te núu na dànèhé ñáhà-í xii-ndo nchàa dava-gá tnúhu.

3 Te ducaⁿ chi quide-ni-ndo nacuaá sàni iní mée-ndó, chi ndècu-ni-ndo ichi cuédú ínì, te nàà ndìhi tnàha-ni-ndo, te ñá túú tnàhí cùu ìⁿnuu-ndo ndecu-ndo. Te xiǎⁿ cútnùnì sá mée-ní nchàa nacuaá sàni iní mée-ndó quide-ndo, te xǐquide-ndo dàtná quidé nchàa ñáyiú ñá túú ndècu ichi Xítóhó Jesucristú.

4 Te dava-ndo càchí-ndó: “Yúhú cùu-í cuendá té Pǎblú.” Te dava-ndo càchí-ndó: “Yúhú cùu-í cuendá té Àpolós”, duha càchí-ndó. Te sá dúcáⁿ càháⁿ-ndó xiǎⁿ cútnùnì sá quidé-ní-ndó mée-ni nchaa nacuaá sàni iní mée-ndó.

5 Te yúhú té Pǎblú càchí tnúhu-í xii-ndo sǎ ñà túú cùnuu-í, te ni té Àpolós ñá túú cùnuu-dé chi dìcó cue téé xínu cuechi núú Yǎ Ndiǒxí cùú-ndǐ, te ní càháⁿ-ndí tnúhu-gá núú-ndó, núu xiǎⁿ ní sándáá iní-ndó. Te ndì dǐⁿ ndì dǐⁿ ndùu chiuⁿ ní táhú Yǎ Ndiǒxí cada-ndí.

6 Te yúhú cùu-í dàtná ìⁿ téé chìhi tatá chi dàcaháⁿ ñáhà-í xii-ndo tùha-ndo ichi Yá Ndiǒxí. Te té Àpolós cùú-dě dàtná ìⁿ téé nàcuhñu chi téé-áⁿ ndécú-dě dánèhé ñáhá-dě xii-ndo tnúhu-gá. Te Yá Ndiǒxí cùú-gǎ Yaá quidé sàhnu tatá ní chihí-í-áⁿ, te duha càháⁿ-í chi diu-gá quidé-gǎ tá nihí ndée-ndó ndècu-ndo ichi-gá.

7 Te núu xiǎⁿ ni téé chìhi tatá te ní téé nàcuhñu ñá túú cùnuu-güedé, dico Yá Ndiǒxí ío cùnuu-gá chi diu-gá quidé-gǎ xǐnu tatá-áⁿ te sàhnu-xi.

8 Te ìⁿ-ni cùu téé chìhi tatá ndìhi téé nàcuhñu. Te ducaⁿ sǎtnhá-xi cùu nchúhú cue téé xǐquide chiuⁿ Yá Ndiǒxí, te nàcuáa ndùu chiuⁿ ní quide-ndí te ducaⁿ cùnduu táhú taxi Yá Ndiǒxí nduu táhú-ndǐ.

9 Te nchòhó cùú-ndó dàtná ìⁿ xichi núú ñǐ quée

tatá, te nchúhú cúú ìⁿnuu-ndí quidé chùⁿ-ndí xíáⁿ. Te ducaⁿ sãtnahá-xi cùu-ndo chi cùu cuendá ñáhá Yã Ndiõxí xii-ndo, te nchúhú cúú ìⁿnuu-ndí quidé-ndí chùⁿ-gá.

Te cùu tucu-ndo datná ìⁿ vehe sá vítná sáá, te ducaⁿ sãtnahá-xi cùu-ndo chi Yã Ndiõxí quidé-gã tá sãhnu nihnu-ndo ichi-gá cuáháⁿ.

10 Te yúhú cúú-í dàtná ìⁿ téé cùnuu dacao vehe te ní tava-í cimièntú-xi, te dèⁿ cue téé véxi dàcaa-güedé ndóho, te ìⁿ ìⁿ cue téé-áⁿ ïo xini ñuhu-xi cada cuendá-güedé nàcuáa dacaa-güedé. Núu ducaⁿ sãtnahá-xi cùu yúhú chi Yã Ndiõxí ní taxi-gá chùⁿ quide-í te chindee ñaha-gá, chi díhna-gá-í ní quixi-í ní cáháⁿ-í tnúhu Xítóhó Jesu-crístú núú-ndó, te dèⁿ cue téé véxi dàcuaha ñaha-ná xii-ndo tnúhu-gá, te ìⁿ ìⁿ cue téé-áⁿ ïo xini ñuhu-xi cada cuendá-güedé nàcuáa dacuaha ñaha-güedé xii-ndo tnúhu-gá.

11 Te cimièntú vehe-áⁿ cada iní-ó sã cúú-xí mèe Xítóhó Jesucrístú, te ducaⁿ chi yúhú ní dánèhé ñáhà-í xii-ndo ñi ngúndecu ndihi-ndo Xítóhó Jesu-crístú, te vá yõo-gã cundecu ndihi-ndo chi ìⁿdì díí-ni-gã ndécú.

12 Te dava cue téé dàcaa-güedé vehe váha te chihí-güedé díhúⁿ cuááⁿ, ndihi díhúⁿ cuixíⁿ, ndihi yúú sã ïo vii càa. Te dava-güedé dácàa-güedé vehe vítú, te dava-güedé dácàa-güedé vehe ité, te dava-güedé dácàa-güedé vehe tnuvixiⁿ.

13 Te sáá nduu te nchaa vehe-áⁿ cãyú-xi, te vehe vítú-ãⁿ ndihi vehe ité-áⁿ ndihi vehe tnuvixiⁿ-áⁿ ndoo ndoo cãyú, te nchaa vehe váha-áⁿ vã cãyú-xi cuèi na yãha ñuhú. Te nchaa cue téé ní dácáá vèhe váha-áⁿ cada iní-ó sã cúú-güedé ñáyiu ío váha quide

chiuⁿ Yá Ndiöxí. Te nchaa cue téé ní dácáá vèhe vítú, ndìhì cue téé ní dácáá vèhe ité, ndìhì cue téé ní dácáá vèhe tnuvixiⁿ cada iní-ó sã cúú-güedě ñáyíu ñá túú cuìní cada chiùⁿ Yá Ndiöxí nàcuáa tàú-xi cunduu. Te sáá nduu te cutnùní nàcuáa ndùu chiùⁿ ní quide ìⁿ ìⁿ ñáyíu, chi Yá Ndiöxí cáháⁿ-gá nàcuáa ndùu chiùⁿ ní quide ìⁿ ìⁿ ñáyíu ní quide chiùⁿ-gá.

14 Te cue ñáyíu ío váha xíquide chiùⁿ Yá Ndiöxí te cùdíi chiùⁿ quidé-yu, te ñáyíu-áⁿ ñíhì-yu sá ndúú tãhù-yu.

15 Te cue ñáyíu ñá túú quide chiùⁿ Yá Ndiöxí nàcuáa tàú-xi cunduu, te vá cùdíi chiùⁿ ní quidé-yu chi cuíta te ndóo-ná-yu duha, dico mèé-yu chi naníhí tãhù-yu.

16 Te yúhú cáháⁿ-í dóho-ndo dándacu-í iní-ndó sã cúú-ndó dàtná vehe Yá Ndiöxí, chi Espíritú-gá ndécú ndìhì ñaha-xi xii-ndo.

17 Te núu yoo na dànaa ñaha xii nchohó ñáyíu cùu veñúhu-gá, te Yá Ndiöxí danàa ñaha-gá xii ñáyíu-áⁿ, te ducaⁿ càda-gá chi nchòhó cúú-ndó ñáyíu cùu cuendá-gá.

18 Te vá dándàhú-ndó mèe-ndo sá ïo túha-ndo. Te núu ìo dava-ndo sàni iní-ndó sã tũha-ndo dàtná sání iní cue ñáyíu ñá túú ndècu ichi Yá Ndiöxí, te cada-ndo sã cúú-ndó dàtná ñáyíu ñá túú tnahí túha, te ducaⁿ te cuu ndisa-ndo ñáyíu túha sá cúú-xí Yá Ndiöxí.

19 Te nchaa sá xìní tnùnì nchaa ñáyíu càchí sá ïo túha ñá túú ndècu ichi Yá Ndiöxí ñá túú nandíhì-xi sá cúú-xí-gã. Te càchí-xi núú tütú-gá: “Nchaa ñáyíu càchí sá ïo túha te Yá Ndiöxí dandõo canúú ñáhá-gã xii-yu núú nchàa sá quidě-yu”, duha càchí-xi núú tütú-gá.

20 Te cächí tucu-xi ingá xichi: “Yá Ndiöxí cútnùní iní-gá nchaa nàcuáa sàni iní ñáyiú cächí sá ïo túha. Te nchaa nàcuáa sàni iní-yu-án cächí-gá sá ñà túú vèdana nàndíhi-xi”, duha cächí-xi núú tùtú-gá.

21 Núú xiǎⁿ càháⁿ-í dóho-ndo sǎ vǎ cächí-ndó sǎ nchǔhú cue tée dǎnehé ñáhá xii-ndo tnúhu-gá ío cǎhnu cuu-ndí. Te nchaa sá ío ñuyíú-a cùu-xi sá vǎha sá cúú-xí-ndó.

22 Te cuèi yúhú ndihi té Àpolós ndihi té Pèlú ndécú-ndí sá cúú-xí-ndó, te cuèi nchaa sá ío ñuyíú-a te cuèi nchaa nduu ndècu-ndo te cuèi sá cùú-ndó dico nchaa cùu-xi sá vǎha sá cúú-xí-ndó. Te cuèi nchaa sá ndécú tnáví, te cuèi nchaa sá cóo ndèé cuèé-gá nchaa cùu-xi sá vǎha sá cúú-xí-ndó.

23 Te mee-ndo ndècu-ndo sá cúú-xí Xǐtohó Jesucristú, te mee Xǐtohó Jesucristú ndécú-gǎ sá cúú-xí Yǎ Ndiöxí.

4

Nàcuáa ndùu chiuⁿ quide cue tée ní táuchúúⁿ Xǐtohó Jesucristú cǎháⁿ tnúhu-gá

1 Te cada cuèndá-ndó sǎ nchǔhú dicó-ni cue tée xìnu cuechi núú Xǐtohó Jesucristú cúú-ndí, te chiúⁿ-án ñí taxi Yá Ndiöxí quidé-ndí cǎháⁿ-ndí tnúhu sá ñí cachí-gá yíyùhu ni cuu.

2 Te xìni ñuhu-xi sá ncháá ñáyiú ducaⁿ ñí sǎñaha Yǎ Ndiöxí chiúⁿ quidé-yu cada ndáá-yu cadá-yu chiúⁿ-án.

3 Te yúhú ñá túú quide cuendá-í nǔu nása ndùu tnúhu cǎháⁿ-ndó cuèndá-í nǔu cùu-í té vǎha àdi ñá túú cùu-í. Te dǐu-ni ducaⁿ ñà túú quide cuendá-í nǔu nása-gá cǎháⁿ nchaa dava-gá ñáyiú cuèndá-í.

Te ni mề-í ñá túú càháⁿ-í nũu cùu-í tée váha àdi ñá túú cùu-í.

⁴ Te sànuu iní-í sá ñà túú nă cúmăni-í núú Yă Ndiõxí, dico ñá díú să xiăⁿ te cachí-í sá ñá túú cuěchi-í ndécú nũú-gă, chi mee-gă nánhá ndăá-gá te núu nása quide-í ndécù-í.

⁵ Te nchòhó vá càháⁿ-gá-ndó să ñà túú cùndáá ñáyiu núú Yă Ndiõxí, chi vátá sàá-gá nduu cùndáá cuěchi-yu. Te na sàá nduu quixi tucu Xítohó Jesucristú te dàvá-áⁿ dātúu-gá nchaa sá quidě-yu, nchaa sá ñà túú xini-ó quidě-yu vitna, te ducaⁿ dātúu-gá nchaa nàcuáa sàni iní-yu. Te Yá Ndiõxí cáháⁿ váha-gá cuendá nchaa ñáyiu ní quide váha.

⁶ Te nchòhó ñáyiu ndècu ndihí-í ichi Xítohó Jesucristú, càcunehe-í té Àpolós ndihí yúhú núú-ndó dānehé ñáhà-í xii-ndo nàcuáa cada-ndo cuendá ducaⁿ cùu-xi ìⁿ sá váha sá cúu-xi-ndó, ndihí cuendá sá nchòhó canchicúⁿ nihnu-ndo càda-ndo mee-ni nchaa nacuáa yòdo tnuní núú tūtú Yă Ndiõxí. Te ducaⁿ te vá càchí-ndó să ìⁿ tée càháⁿ tnúhu Yá Ndiõxí ío-gá càhnu cuu-dé dācúxí ìngá-dé.

⁷ Te nchòhó vá càchí-ndó să ío-gá cùnùu-ndo dācúxí dāva-gá ñáyiu chi Yá Ndiõxí ní quide-gá ní ngúndecu ndihí-ndo nchàa sá xini tnùn-ndó. Te mee-gă ducaⁿ ñi quide-gá ¿Te ná cuendá nchòhó ducaⁿ quide cahnu-ndo mee-ndo? Te quide-ndo datná tnúhu sá mée-ndó ñi quide-ndo dùcaⁿ ní ngúndecu ndihí-ndo nchàa sá xini tnùn-ndó.

⁸ Te nchòhó quidě-ndó să ñà túú tnàhí-gá ná cúmăni-ndó nũú Yă Ndiõxí, te quide-ndo sá ni ñihí-ndó nchàa sá cuini-ndó nũú-gă ndécú ndihí-ndo, te sànuu sá cúu-nă-ndó datná cue tée yìndaha ñáyiu, te nchúhú ñá túú cùu ìⁿnuu ndihí

ñaha-ndí xii-ndo quìndaha ndìhi ñaha-ndí xii-ndo ñáyiú, jte váha-ni te núu dìcò ndisa sá yíndàha-ndo ñáyiú chi tnàhá nchúhú ní tnahá ndìhi ñaha-ndí xii-ndo quìndaha-ó-yu te núu dìcò cúú-xí ìⁿ sá ndàá dico ñáhá!

⁹ Te yúhú quidé cuèndá-í sá nchúhú cue téé ní táuchíúⁿ Xítohó Jesucrìstú cáháⁿ tnúhu-gá núú ñáyiú ní cachí Yă Ndiöxí sá cúú-ndí cue téé ñá túú nàndíhi sá cúú-xí dàva-gá ñáyiú. Te ní cachí tucu-gá sá cúú-ndí dàtná cue ñáyiú sa ní tnahá òré cuú-xi quíhíⁿ nacháhu cuéchi-xi, te nchaa ñáyiú cùnúhu ñàhá-yu xii-ndí sá dúcáⁿ ndòho-ndí, te tnàhá nchaa espíritú cúnúhu ñaha-xi xì-ndí.

¹⁰ Te cuèndá sá xínú cuèchi-ndí núú Xítohó Jesucrìstú, xíⁿ cúú-ndí dàtná cue téé ñá túú vèdana nàndíhi sá cúú-xí ñáyiú. Te nchòhó quidé-ndó sá cúú-ndó ñáyiú ío túha ndècu ndìhi Xítohó Jesucrìstú. Te ñáyiú càchí-yu sá nchúhú cúú-ndí cue téé ñá túú ndàcu cada ìⁿ sá cádá sá cúú-xí Yă Ndiöxí. Te nchòhó quidé-ndó sá cúú-ndó ñáyiú ío váha ndàcu quide ìⁿ sá sání ìní-ndó sá cúú-xí-gă. Te cue ñáyiú dàquee tihú ñáhă-yu xii-ndí, te nchòhó néhě-yu sá yíñùhu núú-ndó.

¹¹ Te nchúhú chi nchaa-ni nduu ío ndòho-ndí, chi xìhí-ndí docó, yìhí-ndí ndute, te ñá túú dǒó-ndí, te nchaa ñáyiú quide úhú ñáhă-yu xii-ndí, te ni vèhe-ndí ñá túú ndèé cáá cùndecu-ndí.

¹² Te ío ndòho-ndí quidé chùⁿ-ndí nìhí-ndí sá xéxí-ndí. Te cue ñáyiú xícuèhé ñáhă-yu xii-ndí dico xìcáⁿ táhú-ndí núú Yă Ndiöxí cuèndá-yu, te ñá cúú

tnàhí quíní ndeé ñáhă-yu xii-ndí dico quède cahnu iní-ndí nchaa sá quidé ñàhá-yu.

13 Te mee-ni tnũhu cuèhé tnũhu duha càháⁿ-yu cuendá-ndí dico sàcahnu iní-ndí te dàsahú-ndí-yu mee-ni tnũhu váha. Te càchí-yu sá cúú-ndí dàtná ìⁿ sá ñà túú-gă vĕdana nàndihî, te nchaa-ni nduu ducaⁿ càháⁿ-yu xăhăⁿ-yu xii-ndí.

14 Te yúhú duha càháⁿ-í núú tûtú-a dàsahú ñáhà-í xii-ndo, dico ñá díú tnũhu sá cúú càháⁿ núú-ndó càháⁿ-í. Te duha càháⁿ-í dóho-ndo chi quède iní-í sá sũúní dàtná déhe mee-í cúú-ndó chi ío cùu iní ñáhà-í xii-ndo.

15 Te nchaa-o ndècu-o ichi Xítóhó Jesucrístú vitna, dico yúhú cúú-í téé díhna nuu nĭ dánèhé ñáhá xii-ndo nacuáa ndùu tnũhu sá càháⁿ nàcuáa naníhí tãhú-ó, núu xĭăⁿ cúú-í dàtná tãtá-ndó. Te cuĕi vâi vihi cue téé na quixi-güedé danèhé ñáhá-güedĕ xii-ndo tnũhu-gá dico ìⁿ ði-ni yúhú cúú-í téé díhna nuu-gă ní dánèhé ñáhá xii-ndo tnũhu-gá.

16 Núu xĭăⁿ càháⁿ-í dóho-ndo să cãncĭcúⁿ ni-hnu-ndo càda-ndo nchaa nacuáa quède-í.

17 Te xĭăⁿ nũu sa ní tendaha-ĭ té Timùteú véxi coto ñaha-dĕ xii-ndo, te téé-áⁿ ío cùu iní-í-dé te quède ndáá-dé, te cùu-dé dàtná déhe-í chi yúhú ní sanu ichi-í-dé ichi Xítóhó Jesucrístú, te téé-áⁿ cachí tnũhu-dé xii-ndo nchàa nacuáa quède-í ndécù-í ichi-gá. Te ði-u-ni nàcuáa na càchí tnũhu-dé-áⁿ ði-u-ni ducaⁿ quède-í nchaa xichi núú tàcá ñáyiu dàcuaha tnũhu Xítóhó Jesucrístú.

18 Te dava nchòhó ío quède cahnu-ndo mee-ndo chi sàni iní-ndó să vă quixí-gă-í quixi coto ñaha-ĭ xii-ndo.

19 Dico núu mee Yă Ndiöxí ná càchí-gá te ío ndìhi quixi coto ñaha-í xii-ndo, te dàvá-áⁿ quiní-í te núu nása quide nchaa ñáyiú ducaⁿ ío xíquide càhnu mee-xi-áⁿ ndécũ-yu ichi Xítohó Jesucrístú. Te vá cádá cuèndá-í tnúhu càháⁿ-yu chi chiuⁿ quidé-yu cada cuèndá-í.

20 Te vitna yìndaha ñaha Yá Ndiöxí xii-o, te chìndee ñaha-gá xii-o quide-o nchaa sá vâha sàni iní-ó quide-o te ñá díú mèe-ni sá càháⁿ-ó.

21 Te ío chí cání iní núu ndëdacàa sá vâha-gá cada-í òré ná quèxi-í núú ndécú-ndó, núu sá ténáá ñáhà-í xii-ndo àdi sá càháⁿ ndìhi ñaha-í xii-ndo ndìhi tnúhu vii tnúhu váha nàcuáa cutnùní iní-ndó sá cúú iní ñáhà-í xii-ndo.

5

Ëⁿ cuéchi càhnu vihi

1 Te yúhú sa ní níhí ndáá-í tnúhu nàcuáa cùu ndecu-ndo, chi ìⁿ téé ndècu ndìhi-ndo ndeca-dé náná cháhà-dé. Te xíãⁿ cúú-xí ìⁿ cuéchi càhnu vihi, chi ndéé nchaa ñáyiú ñá túú ndècu ichi Yá Ndiöxí càchí-yu sá vâ cúú tnàhí ducaⁿ càda-o.

2 ;Te nchòhó ío quide cahnu-ni-ndo mee-ndo xíndecu-ndo! ;Te tàú-ndó sã cùndìyí-ndó ndìxi cuéchi iní-ndó sã dúcáⁿ cùu ndecu-ndo ni cuu! Te téé ducaⁿ quide-áⁿ xíní ñùhu-xi sá vâ dáñá-gã-ndó ñíhí tnáhá ndìhi ñaha-dé xii-ndo ni cùu dico ñá túú dùcaⁿ quide-ndo.

3 Te yúhú ñá túú ndècu ndìhi ñaha-í xii-ndo dico dàtná tnúhu sá ndécú ndìhi ñaha-í xii-ndo chi ducaⁿ-ni ío ñùhu iní ñáhà-í xii-ndo. Te yúhú càchí-í sá náchãhu téé-áⁿ cuéchi-dé sá dúcáⁿ quide-dé, te

d̄iu-ni ducaⁿ cãháⁿ-í núú-ndó te núu d̄icó ndécú nd̄ih̄i ñaha-í xii-ndo.

⁴ Te òré nátacá-ndó cãháⁿ nd̄ih̄i-ndo Yă Ndiõxí te d̄iu-ni Xítohó Jesucristú ñá túú d̄aña ndéé-gá ch̄indèe ñaha-gá xii-ndo, te òré-áⁿ cada-ndo n̄acuáa cuiⁿí Xítohó Jesucristú cada-ndo, te cada iní-ndó sã tnàhá-í ndécú nd̄ih̄i ñaha-í xii-ndo.

⁵ Chi tàú-xi sá t̄ee ducaⁿ quide-áⁿ daquèe tíh̄ú-ndó-dě, te ducaⁿ te s̄acuíhná dandòho ñaha-xi xii-dé cuèi na cùú-dé, dico na s̄aa nduu te nduu táh̄ú-dě cundecu-dé nd̄ih̄i Xítohó Jesucristú.

⁶ Te nchòhó ñá túú ndùu v̄aha-xi sá c̄achí-ndó sã ò c̄ahnu cuu-ndo. Te x̄iní-ndó sã cuèi luha-ni levadurá ná qūihu yuchi cuáha p̄aa d̄andaa-xi cuèi luha-ni n̄a qūihu te nih̄í-ni yuchi s̄aháⁿ ndoho-xi. Te ducaⁿ s̄atnahá-xi cùu nchohó chi núu ndècu nd̄ih̄i-ndo ìⁿ ñáyi^u quide sá ñà túú v̄aha te nchaa-ndo ñà túú-gã cúú v̄aha iní-ndó ndècu-ndo.

⁷ Te x̄ini ñuhu-xi sá c̄adá-ndó datná quidé cuè ñáyi^u quide vico pascuá, chi ñá túú ch̄ih̄i-yu levadurá yuchi cuáha p̄aa x̄ex̄i-yu nduu quidé-yu vico-áⁿ. Te sá qūihu p̄aa-áⁿ cada iní-ó sã cúú-xí nchàa sá cuèhé sá dúhá ñ̄ x̄oo cada-ndo. Te v̄a c̄adá-gã-ndó ñ̄ ìⁿ sá cuèhé sá dúhá, te ducaⁿ te cuu-ndo ñáyi^u v̄aha chi sa ní nduu ndoo ní nduu nine iní-ndó. Te cue mbéé cue quit̄i ní x̄oo cahni-güedé nduu p̄ascuá cue quit̄i-áⁿ cada iní-ó sã cúú-güèd̄i datná Xítohó Jesucristú n̄acuáa ní x̄ih̄i-gá núú cùrúxí.

⁸ Te núu x̄iãⁿ x̄iní ñuhu-xi sá v̄a c̄adá-gã-ndó ñ̄ ìⁿ sá cuèhé sá dúhá sã ñ̄ x̄oo cada-ndo, te ni v̄a cúh̄úⁿ-gã iní-ndó te ni v̄a c̄adá-gã-ndó, te ni yùhu ñ̄ iní-ná-ndó c̄ada-ndo mee-ni sá v̄aha.

⁹ Te tutú sá sà ní dáquix̄i-í ndaha-ndo ñ̄ cachí-í

sá vǎ ñihí tnáhá-ndó ndìhi cue ñáyiú ndècu ichi díí ìní.

10 Te sá dúcáⁿ cǎháⁿ-í núú tütú ní dáquíxì-í ndaha-ndo te vǎ cǎní ìní-ndó sǎ yǔhú cǎchí-í sá vǎ cúú-gǎ tnahá tnúhu-ndo ndìhi cue ñáyiú ndècu ichi cuehé ichi duha, ndìhi ñáyiú ndècu ichi díí ìní, ndìhi ñáyiú xìho nchaa sǎ ìó ñuyíú, ndìhi ñáyiú dùhu sá ndécú ndìhi tnahá ñáyiú-xi, ndìhi ñáyiú quide cahnu sá cǎchí-yu cùu ndióxí te ñá ndǎá sǎ ndiǒxí cúú-xí chi dìcó cue téé ñuyíú-a ní cadúha nchaa xǎⁿ, chi núu ducaⁿ na cǎda-ndo vǎ tnáhá tnúhu-gǎ-ndó ndìhí-yu te xìni ñuhu-xi sá vǎ cùndècu-gǎ-ndó núú ndécú-yu.

11 Te ñá túú dùcaⁿ quee-xi nacuáa cǎháⁿ-í núú tütú-í, chi yúhú cǎchí-í sá vǎ cúú tnáhá tnúhu-ndo ndìhi ñáyiú cǎchí sá ndécú ìchi Xítóhó Jesucristú te ñá ndǎá sǎ ndécú-yu ichi-gǎ. Te núu cùú-yu ñáyiú ndècu ichi díí ìní, àdi cuú-yu ñáyiú xìho nchaa sǎ ìó ñuyíú-a, àdi cuú-yu ñáyiú quide cahnu nchaa sǎ cǎchí-yu cùu ndióxí te ñá ndǎá chi dìcó cue téé ñuyíú-a ní cadúha nchaa xǎⁿ, àdi cuú-yu ñáyiú yiti yùhu-xi, àdi cuú-yu ñáyiú quihu, àdi cuú-yu ñáyiú dùhu sá ndécú ndìhi tnahá ñáyiú-xi, te nchaa ñáyiú ducaⁿ cǎchí sá ndécú ìchi-gǎ te ñá ndǎá te ducaⁿ xǐquidé-yu, te ni vǎ cúú ñihí tnáhá-ndó ndìhí-yu caxi-ndo ndìhí-yu.

12-13 Te ñá díú yúhú cúú-í téé cǎháⁿ cuendá nchaa ñáyiú ñá túú ndècu ichi Xítóhó Jesucristú núu quide ndǎá-yu àdi ñá túú quide ndǎá-yu ndécú-yu, chi mee Yǎ Ndiǒxí cǎháⁿ-gǎ te núu nása quidé-yu ndécú-yu. Dico nchòhó chi tàú-ndó

càda cuendá-ndó nũ nása quide cue ñáyiú ndècu ndihì-ndo ichi Xítóhó Jesucristú. Núu xíãⁿ xíní ñũhu-xi daquee tíhú-ndó tẽe ducaⁿ ñà túú quide váha ndècu ndihì-ndo-áⁿ, te vá dáñá-gã-ndó ñihí tnáhá ndihì ñaha-dé xii-ndo.

6

Nàcuáa tàú-xi cada ñáyiú ndècu ichi Xítóhó Jesucristú te núu ñà túú ndècu ndihì váha tnáhá-yu

¹ Te dava nchòhó òré ñà túú ndècu ndihì váha tnàha-ndo te cùyii-ndo cuáháⁿ-ndó nũú cuè tée cùchiuⁿ ñà túú ndècu ichi Xítóhó Jesucristú sàcáⁿ cuèchi-ndo, te ñà túú dùcaⁿ taú-xi cada-ndo chi núú cuè tée ndècu ichi-gá ducaⁿ tàú-ndó quĩhíⁿ-ndó càcáⁿ cuèchi-ndo.

² Te nchòhó sa nàha-ndo sá ncháá ñăyiú cùu cuendá Yã Ndiõxí sáá nduu cãháⁿ-yu te núu ní quide ndáá nchaa dava-gá ñáyiú àdi ñà túú ní quide ndáá-yu, te nchòhó tnáhá-ndó cùu-ndo ñáyiú ducaⁿ cãháⁿ, te núu ducaⁿ te cutnùní iní-ndó sã ndácú-ndó càda ndáá-ndó nchàa cuèchi sá ñã túú ùhú cundáá vitna ndècu-ndo ñuyíú-a.

³ Te nchòhó sa nàha-ndo sá ncháá ndéé cue espíritú xínú cuèchi núú Yã Ndiõxí sáá nduu cãháⁿ-ó te núu nása quide-xi ndecu-xi. ¡Núu xíãⁿ cùtnùní iní-ó sã úúⁿ-gã ndacu-o càda ndáá-ó nchàa cuèchi sá ió ñuyíú-a!

⁴ Te núu ió dava-ndo ió nása cùu ndecu-ndo te xĩnàá-ndó, te vá quĩhíⁿ-ndó càcáⁿ cuèchi-ndo nũú cuè tée ndèhe-ndo sá ñà túú ndècu-güedé ichi Yã Ndiõxí, dico nchòhó chi da núú cuè tée-áⁿ cuáháⁿ-ndó sàcáⁿ cuèchi-ndo.

5 Te duha càháⁿ-í cuendá cucahaⁿ núú-ndó chi ñá túú quède váha-ndo sã dúcáⁿ quède-ndo. ¿Te náa dícó-ñá ñá túú tnàhí ìⁿ tée cùtnuní iní-xi nàcuáa cada ndáá cuéchi-ndo ndècu ndìhi-ndo ichi Xítohó Jesucristú-ãⁿ?

6 Te nchòhó, ñá túú quède váha-ndo, chi dava-ndo cuáháⁿ-ndó nũú cuè tée ñá túú ndècu ichi Xítohó Jesucristú sàcáⁿ cuéchi-ndo cuendá dava-gá cue ñáyiú ndècu ndìhi-ndo ichi-gá.

7 Te ñá túú quède váha-ndo sã dúcáⁿ nàá ndìhi tnàha-ndo te cuáháⁿ-ndó sàcáⁿ cuéchi-ndo, te váha-gá sá cáda càhnu iní-ndó cuèi nándi na càda ñaha tnaha ñáyiú-ndo xì-ndo cuèi dùhú-yu sá ndécú ndìhi-ndo dico cada càhnu-ni iní-ndó.

8 Dico nchòhó chi ñá túú quède cahnu iní-ndó chi da uuⁿ-gá ñá túú quède váha-ndo sàcúú-xí tnàha ñáyiú-ndo, chi cùu úhú iní-ndõ-yu, te dùhu-ndó-yu, te ndéé méé-ndó nàcuáa ndècu-ndo ichi Xítohó Jesucristú ducaⁿ quède tnaha-ndo.

9 Te nchòhó sa nàha-ndo sá ncháá ñáyiú ndècu ichi cuehé ichi duha vá ndúú tãhũ-yu cundecú-yu núú ndécú Yã Ndiõxí táxí tnùní-gá, núu xíãⁿ vá cání iní-ndó sã ñáyiú-áⁿ nduu tãhũ-yu cundecú-yu ndìhi-gá. Te ni cuè ñáyiú ndècu ichi díí iní, te ni cuè ñáyiú quède cahnu nchaa sá càchí-yu cùu ndiõxí te ñá ndáá chi dícó cue tée ñuyíú-a ní cadúha nchaa xíãⁿ, te ni cuè tée càháⁿ ndìhi ñadìhí te ñá díú ñadìhí-güedé cúũ-yu, te ni cuè ñáyiú dìhí càháⁿ ndìhi tée te ñá díú yĩⁿ-yu cùu-güedé, te ni cuè tée càháⁿ ndìhi tnàha tée-xi,

10 te ni cuè ñáyiú dùhu, te ni cuè ñáyiú xìho sá ndécú ndìhi tnaha ñáyiú-xi, te ni cuè ñáyiú quihu, te ni cuè ñáyiú càháⁿ úhú, te ni cuè ñáyiú dãnícüehé

tnàha ñǎyiu-xi te dùhu ñahá-yu, te ni ñⁿ cue ñáyiu duha xǐquide vá ndúú tǎhǔ-yu cundecú-yu núú ndécú Yǎ Ndiǒxí táxí tnùnǐ-gá.

11 Te dava nchòhó ducaⁿ ñǐ xóo cada-ndo ni cùu, te vitna ní cuu-ndo ñǎyiu sa ní nduu ndoo ní nduu nine iní-xi, te ní cuu-ndo ñǎyiu cùu cuendá Yǎ Ndiǒxí, te ní cuu tucu-ndo ñǎyiu ñá túú-gǎ cuéchi-xi ndècu núú-gǎ. Te ducaⁿ ñǐ quide ñaha Yǎ Ndiǒxí xii-ndo sǎ vǎha sá cuendá Xítóhó Jesucristú, te ní ngúndecu ndihǐ-ndo Espíritú Yǎ Ndiǒxí.

Nàcuáa ndùu cuendá yiqui cùñú-ó

12 Te càchǐ ñáyiu sá ncháá sǎ sání ìní-ó cuu cada-o, te ndáá càháⁿ-yu dìcò-ni sá ñǎ ncháá cùu-xi sá vǎha sá cúú-xí-ó. Te núu cuìní nchaa sá sání ìní-ó-ǎⁿ taxi tnùnǐ ñahá-xí te vá cádá-ó.

13 Te nchòhó sa xìnǐ-ndó sǎ ncháá sǎ xéxí-ó cuǎnguee-xi xitǐ-ó, te xitǐ-ó ñǐ cuáha tnàhǐ-xi sá cúhúⁿ nchàa sá cáxí-ó, dico xitǐ-ó ndihǐ nchaa sá xéxí-ó chi naa-xi. Te Xítóhó Jesucristú néhé cuendá-gá yiqui cùñú-ó, te ducaⁿ yiqui cuñú-ó cùu-xi cuendá-gá, te ñá túú ní cuáha yiqui cùñú-ó sǎ cúndècu-xi ichi dǐí ìní.

14 Te dàtná ní quide Yá Ndiǒxí ní dándótó-gǎ Xítóhó Jesucristú ducaⁿ càda ñaha-gá xii nchoo tùcu chi dandòto ñaha-gá xii-o nùu na cùú-ó, chi ndàcu-gá quidé-gǎ nchaa sá vǎha.

15 Te nchòhó sa nàha-ndo sá yiqui cuñú-ó cùu-xi cuendá Xítóhó Jesucristú chi ñⁿ-ni cùu-o ndihǐ-gá, núu xǐǎⁿ ñá túú tnàhǐ ndùu váha-xi cáháⁿ ndihǐ-o ñǎyiu ndècu ichi dǐí ìní, chi yiqui cùñú-ó cùu-xi cuendá Xítóhó Jesucristú, te núu ducaⁿ na càda-o te

cada iní-ó sǎ cuendá-nǎ ñáyiú-án cúú yìqui cuñú-ó, núú xiǎⁿ ñǎ túú tnàhí ndùu váha-xi ducaⁿ càda-o.

16 Te sa xìní-ndó sǎ núú ìⁿ téé na càháⁿ ndihí-dé ìⁿ ñadìhí ndécú ìchi díí ìní te cada iní-ó sǎ ìⁿ-nǎ yìqui cùñú cúú-yu. Te ducaⁿ càháⁿ-xi núú tùtú Yǎ Ndiòxí núú càchí-xi: “Ìⁿ téé na càháⁿ ndihí-dé ìⁿ ñadìhí te ìⁿ-nǎ yìqui cùñú cúú-yu”, duha càchí-xi.

17 Te ducaⁿ sǎtnahá-xi cùu nchaa ñáyiú tnàhá tnúhu ndihí Xítohó Jesucrístú, chi ìⁿ-nǎ cúú-yu ndihí-gá.

18 Te núú xiǎⁿ càháⁿ-í dóho-ndo sǎ vǎ cùndècu-ndo ichi díí ìní, chi núú ducaⁿ na càda-ndo te ñǎ túú tnàhí sǎ vǎha cùu-xi sǎ cúú-xí yìqui cuñú-ndó chi ío dàcuíta nihnu-xi yìqui cùñú-ndó. Te nchaa dava-gá sǎ cuèhé sǎ dúhá ñǎ túú quide-xi yìqui cuñú-ndó dàtná quidé xiǎⁿ.

19 Te nchòhó sa cùtnuní iní-ndó sǎ yìqui cuñú-ndó cùu-xi datná ìⁿ vehe núú ndécú Espíritú Yǎ Ndiòxí. Te ducaⁿ sǎtnahá-xi cùu yìqui cuñú-ndó chi ndècu-ndo ndihí Espíritú-gá. Te mee-gǎ ní taxi-gá Espíritú-gá ndécú ndìhí-ndo, te ñǎ díú mèe-ndo cuu cuendá-ndó mèe-ndo chi Yá Ndiòxí cúú cuendá ñáhá-gǎ xii-ndo.

20 Te ducaⁿ cùu-ndo ñáyiú cùu cuendá Yǎ Ndiòxí chi Xítohó Jesucrístú ní nacháhu-gá nchaa yíca cuèchi-ndo. Te núú xiǎⁿ xìní ñùhu-xi sǎ ñihí ní ndúú-ndó càda-ndo nacuáa cuu càhnu Yá Ndiòxí, te ducaⁿ tàú-xi cada-ndo chi espíritú-ndó ndihí yìqui cuñú-ndó cùu-xi cuendá-gá.

7

Sáhú sǎ cúú-xí ñáyiú ní tnándaha

1 Te ní quexìo tutú sá ñǎ dáquíxí-ndó ndàha-í, te vitna na càchí tnúhu-í xii-ndo cuendá tnúhu càháⁿ-ndó nǔú tǔtú-ndó. Te váha cada-xi te núu vá cándèca téé ñadìhí, te ducaⁿ-ni vǎha cada-xi te núu ñáyiú dìhí vá cándècá-yu téé.

2 Te dicó-ni sá nǔú ducaⁿ na càda-ndo te dava-ndo càni iní-ndó cùndecu-ndo ichi díí ìní. Núu xiǎⁿ xíní ñùhu-xi sá ncháá cuè téé ndi dííⁿ cùndecu ñadìhí-güedé, te ducaⁿ-ni tucu nchaa cue ñáyiú dìhí ndi dííⁿ cùndecu yíí-yu.

3 Te càchí tnúhu-í xii-ndo sǎ ncháá cuè téé vá cúú càchí-güedé sá vǎ cúú cǎháⁿ ndihí-güedé ñadìhí-güedé, te ñu-ni ducaⁿ cuè ñáyiú dìhí tucu, vá cúú càchí-yu sá vǎ cúú cǎháⁿ ndihí-yu yíí-yu.

4 Te nchaa cue ñáyiú dìhí chi ñǎ díú mèe-ní-yu cùu cuendá-yu yiquí cùñú-yu chi tnàhá cúú cuendá yíí-yu, te ducaⁿ-ni ncháa cue téé tucu chi ñǎ díú-ní mèe-güedé cúú cuendá-güedé yiquí cùñú-güedé chi tnàhá cúú cuendá cue ñadìhí-güedé.

5 Te cue téé vá cúú càchí-güedé sá vǎ cúú cǎháⁿ ndihí-güedé ñadìhí-güedé. Te ni cuè ñáyiú dìhí vá cúú càchí-yu sá vǎ cúú càháⁿ ndihí-yu yíí-yu. Àdi te núu ní ndatnúhu-yu sá vǎ dúcáⁿ càdá-yu ìíⁿ ùú nduu cuendá sá cuìní-yu ío cǎháⁿ ndihí-yu Yá Ndiöxí, dico nà yáha núu ná daha nduu ducaⁿ ñǎ ndatnúhu-yu sá vǎ dúcáⁿ càdá-yu te naníhí tnàhá túcú-yu, chi núu ñáhá te cudana te vá cuácàhnu iní-yu te sácúíhná dacàháⁿ ñáhá-xí xii-yu cadá-yu sá ñǎ túú tàú-yu cadá-yu.

6 Te tnúhu càháⁿ-í-a quèe-xi sá tée ndihí ñadìhí cuu candeca tnàhá-yu dico ñǎ túú quède yica-í sá

dúcáⁿ càdá-yu.

⁷ Te yúhú sání iní-í sá nũu dìcò sá cúú te nchaa-ndo cùndecu-ndo datná ndécù-í, dico ñáhá chi mee Yá Ndiõxí ní cachí-gá nàcuáa nduu táhú-ó ìⁿ ìⁿ-o cundecu-o, chi dava-o ñi cutáhú-ó nũú-gă sá cùndècu ñadihí-ó te dava-o ñáhá.

⁸ Te càchí tnúhu-í xii nchòhó cue téé vátá ñihí-gá ñadihí-xi sá vâha-gá sá nũu vá cùndècu ñadihí-ndó dàtná yúhú. Te ducaⁿ-ni nchòhó cue ñáyiu ñihí ñáyiu vátá ñihí-gá yì-xi sá vâha-gá sá nũu vá cùndècu yì-ndo. Te ñu-ni duha càháⁿ-í sá cúú-xí nchàa nchòhó ñáyiu ñihí ní quendóo quèé sá vâha-gá sá nũu vá càndèca-gá-ndó tée.

⁹ Te càchí tnúhu-í xii nchaa-ndo sã nũu xìto-ndo sá vã cùndèe iní-ndó cùndecu mee-ndo te vâha-gá sá nũu tnándaha-ndo, te ñá díú sã mée-ní càni cuehé cani duha iní-ndó cùndecu-ndo.

¹⁰ Te nchaa nchòhó ñáyiu sa ní tnándaha càháⁿ-í dóho-ndo, te ñá díú mée-í duha càhu iní-í càháⁿ-í dóho-ndo chi Xítóhó Jesucristú ducaⁿ dàcahu iní ñáhá-gă xii-í, chi mee-gă cuíní-gá cada-ndo nàcuáa na càháⁿ-í-a. Te nchaa nchòhó cue ñáyiu ñihí càháⁿ-í dóho-ndo sã vã dáñá-ndó yì-ndo.

¹¹ Te núu ió dava-ndo sà ní dáñá-ndó yì-ndo, te xìni ñuhu-xi sá vã càndèca-gá-ndó tée, chi cundecu mee-ñã-ndó àdi núu ñáhá te naqueheⁿ tucu-ndo tée ní cuu yì-ndo. Te nchaa nchòhó cue téé ndècu ñadihí-xi càháⁿ-í dóho-ndo sã vã dáñá-ndó ñáyiu cùu ñadihí-ndó.

¹² Te tnúhu na càháⁿ-í-a cùu-xi sá ñi sani iní mée-í te ñá díú tnúhu sá ñi cachí Xítóhó Jesucristú càháⁿ-í cúú-xí. Te núu dava nchòhó cue téé ndècu ichi

Xítohó Jesucrístú ndécá-ndó ñáyiú ðíhí ñáyiú ñá túú ndècu ichi-gá, te vá dáñá-ndó-yu te núu cùu váha iní-yu ndèca ñahá-yu xii-ndo.

¹³ Te núu dava nchòhó cue ñáyiú ðíhí ñáyiú ndècu ichi Xítohó Jesucrístú ndécá-ndó cuè téé ñá túú ndècu ichi-gá te vá dáñá-ndó-güedë te núu cùu váha iní-güedé ndécá ñaha-güedé xii-ndo.

¹⁴ Te núu ìⁿ téé ñá túú sàndáá iní-dé Xítohó Jesucrístú te ñadìhí-dé sàndáá iní ñahá-áⁿ xii-gá, te téé-áⁿ ñí cuu-dé ìⁿ téé sa ní cuyatni tnahá tnúhu ndìhí ñaha xii-gá sá cuèndá ñadìhí-dé. Te ducaⁿ sätnahá-xi cùu tucu ñadìhí ñá túú sàndáá iní ñahá xii Xítohó Jesucrístú te yìⁿ-aⁿ sàndáá iní ñahá-dë xii-gá, te ñaha-áⁿ sa ní cuyatni tnahá tnúhu-aⁿ ndìhí-gá sá cuèndá yìⁿ-aⁿ, te ðiu-ni ducaⁿ sätnahá-xi cùu cue landú-yu chi sa ní cuyatni tnahá tnúhu-güexi ndìhí-gá. Te núu vá dúcáⁿ cùu te cue landú-yu-áⁿ ïo xica cùndecu-güexi núú-gă.

¹⁵ Te núu ìⁿ téé ñá túú sàndáá iní ñahá xii Xítohó Jesucrístú cuìní-dé dañá tnàha-dé ndìhí ñadìhí-dé ñaha sàndáá iní ñahá xii Xítohó Jesucrístú, te ðiu-ni na càda-dé nàcuáa sàni iní-dé. Te ðiu-ni ducaⁿ tucu te núu ñadìhí ñaha ñá túú sàndáá iní ñahá xii Xítohó Jesucrístú cuìní-aⁿ dañá-aⁿ tée sàndáá iní ñahá xii-gá, téé cùu yìⁿ-aⁿ te ðiu-ni na càda-aⁿ nacuáa sàni iní-aⁿ. Chi téé sàndáá iní ñahá xii Xítohó Jesucrístú ñá túú tàú-dé cada yica-dë ñadìhí-dé cundecu ndìhí ñaha-aⁿ xii-dé te núu ñá túú cuìní-aⁿ. Te ðiu-ni ducaⁿ ñadìhí ñaha sàndáá iní ñahá xii-gá ñá túú tàú-aⁿ cada yica-aⁿ cùndecu ndìhí ñaha yìⁿ-aⁿ xii-aⁿ te núu ñá túú cuìní-dé cundecu ndìhí ñaha-dë xii-aⁿ, chi Yá Ndiöxí cuìní-gá sá ncháá nchòo ñáyiú ndècu ichi-gá cundecu váha-o vă nàá-ó.

16 Chi cue téé sàndáá iní tnúhu Xítóhó Jesucrìstú ñá túú cùtnuní iní-güedé te núu ndacu-güedé canu ichi-güedé ñadihí-güedé ichi-gá àdi ñáhá te núu ñá túú sàndáá iní ñáhă-yu xii-gá, te ducaⁿ-ni cue ñáyiu ðihí sàndáá iní tnúhu Xítóhó Jesucrìstú ñá túú cùtnuní iní-yu te núu ndacú-yu canu ichí-yu yí-yu ichi-gá àdi ñáhá te núu ñá túú sàndáá iní ñáhá-güedé xii-gá.

17 Te duha na càchí tnúhu-í xii-ndo, nchaa chiúⁿ ní nduu táhú-ndó nǔú Yă Ndiöxí quidé-ndó ndéé cùtnàhá ní cáháⁿ ñáhá-gă xii-ndo nǐ natuha-ndo ìchi-gá te ðiu-ni chiúⁿ-áⁿ cada-ndo cùndecu-ndo. Te nchaa xichi núú tàcá ñáyiu dàcuaha tnúhu-gá ðiu-ni duha càháⁿ-í dóho-yu.

18 Te nchaa cue téé ndècu seña ñii-xi dàtná ní cachi ndíí Moisés, cue téé ní cáháⁿ Yă Ndiöxí ndécú ìchi-gá, te ðiu-ni ducaⁿ cùnduu-güedé cundecu-güedé, te nchaa cue téé ñá túú ndècu seña ñii-xi ní cáháⁿ-gá cundecu ichi-gá, ðiu-ni ducaⁿ cùnduu-güedé cundecu-güedé vá cuăha-güedé seña ñii-güedé.

19 Te iiⁿ-ni cùu-xi cuéi na cuăha-o seña ñii-o àdi vá cuăha-o. Te sá ïo-gá xíní ñùhu-xi cada-o xiáⁿ cúu-xí sǎ cádá-ó nchàa nacuáa cuiní Yă Ndiöxí.

20 Chi xini ñuhu-xi sá cùndecu-ni-o datná ndécú-ó cùtnàhá ní cáháⁿ ñáhá Yă Ndiöxí xii-o nǐ ngúndecu-o ìchi-gá.

21 Te núu cùu-ndo ñáyiu ñá túú tnàhí dàña quee núú chíúⁿ patróóⁿ-xi cùtnàhá ní cáháⁿ ñáhá Yă Ndiöxí xii-ndo, te ñá túú nǎ cani iní-ndó, dico núu dàña ñaha patróóⁿ-ndó quèe-ndo núú chíúⁿ-ndó te váha-ni quee-ndo nǔú chíúⁿ-ndó.

22 Te sátá nǐ cáháⁿ ñáhá Xítóhó Jesucrìstú xii

nchòhó ñáyiú ducaⁿ ñà túú tnàhí dàñá quee núú chíúⁿ pàtróóⁿ-xi-áⁿ, te ní cuu-ndo dàtná ñáyiú dàñá queé nùú chíúⁿ pàtróóⁿ-xi sá cúú-xí-gă, te ducaⁿ chi ñá túú-gă ndécú-ndó ìchi cuehé ichi duha. Te nchòhó ñáyiú dàñá queé nùú chíúⁿ pàtróóⁿ-xi cùu-ndo datná ñáyiú ñá túú tnàhí dàñá quee núú chíúⁿ pàtróóⁿ-xi sá cúú-xí Xítóhó Jesucristú, te ducaⁿ chi xínu cuechi-ná-ndó nùú-gă.

23 Te Yá Ndióxi ní nduu cuendá ñáhá-gă xii-o chi Xítóhó Jesucristú ní nacháhu-gă nchaa yíca cuèchi-o sã ndécú nùú Yã Ndióxi ní cùu, te vá dáñá-ndó sã tnàha ñáyiú-ndo nàdatuhú iní ñáhă-yu xii-ndo vã cúnú cuèchi-ndo núú Xítóhó Jesucristú nàcuáa tàú-xi cunduu.

24 Te núu xíáⁿ càchí tnúhu-í xii nchaa nchòhó ñáyiú ndècu ndihí-í ichi Xítóhó Jesucristú sá cùndècu-ni-ndo datná-ni ndècu-ndo ndéé cútnàhá ní cáháⁿ ñáhá-gă xii-ndo, te ñiu-ni ducaⁿ cùndècu-ndo ichi-gă.

25 Te càchí tnúhu tucu-í xii-ndo sã Xítóhó Jesucristú ñá túú càchí tnúhu-gă xii-í nùu nása cáháⁿ-í cuendá nchaa ñáyiú vátá tnãndaha-gă. Te duha sàni iní-í cáháⁿ-í cuendá-yu, te nchòhó cuu quíndáá iní-ndó tnúhu càháⁿ-í chi Xítóhó Jesucristú chíndèe chitúu ñaha-gă xii-í.

26 Te yúhú càchí-í sá sã cuendá nchaa tnúndòho tnúhu ndàhú ió ñuyíú-a vitna, te váha-gă sá ncháá ñáyiú te núu nása xíndécú-yu te ducaⁿ-ni na cùndécú-yu.

27 Te nchaa cue téé ndècu ñadihí-xi te ducaⁿ-ni na cùndècu-güedé ndihí-yu, te nchaa cue téé ñá túú ñàdihí-xi te ducaⁿ-ni na cùnduu-güedé vá

ndúcú-güedě ñadìhí-güedé.

28 Dico nchaa cue téé na ndùcu ñadìhí-xi te ñá díú ìⁿ cuéchi cùu-xi sá dúcáⁿ ná ndùcu-güedé ñadìhí-güedé, te diu-ni ducaⁿ cùu tucu cue ñáyiu dìhí te núu na nìhí-yu yíⁿ-yu chi ñá díú ìⁿ cuéchi cùu-xi sá dúcáⁿ nìhí-yu yíⁿ-yu. Te núu cue téé na nìhí-güedé ñadìhí-güedé te nándi ndohó-yu cundecú-yu ñuyíú-a, te núu xíⁿ duha càháⁿ-í cuendá sá vǎ ndúcú-güedě ñadìhí-güedé cuendá sá vǎ ndóhǒ-yu.

29 Te nchaa nchòhó ñáyiu ndècu ndìhi-í ichi Xítóhó Jesucristú na càchí tnùhu-í xii-ndo sǎ ñǎ túú-gǎ vǎi nduu cumání te quixi tucu Xítóhó Jesucristú, núu xíⁿ xíní ñùhu-xi sá ndéé vitna ngúíta nchaa cue téé ndècu ñadìhí-xi cada-güedé chiⁿ Xítóhó Jesucristú, te cada-güedé dàtná sá ñà túú ñàdìhí-güedé.

30 Te nchaa ñáyiu ndìhú iní-xi te na càda-ní-yu sá ñà túú ndìhú iní-yu cadá-yu chiⁿ Yá Ndiǒxí. Te nchaa ñáyiu cùdíⁿ iní-xi te na càda-ní-yu sá ñà túú cùdíⁿ iní-yu cadá-yu chiⁿ-gá, te nchaa ñáyiu ndècu ndìhi nándi sá ndécú ndìhi te na càda-ní-yu sá ñà túú nǎ ndécú ndìhí-yu cadá-yu chiⁿ-gá.

31 Te nchaa ñáyiu nèhe chiuⁿ nchaa sá ió ñuyíú-a te na càda-ní-yu cuendá sá ñà túú nǎ néhé chiⁿ-yu cadá-yu chiⁿ Yá Ndiǒxí, chi nchaa sá ió ñuyíú-a sa ñùhu-xi ichi cuáháⁿ-xi núú ndìhí nìhnu-xi.

32 Te cùní-í sá vǎ cùhúⁿ iní-ndó nándi sá ió ñuyíú-a, te ni ñà túú tnàhí ná cani iní-ndó cùndecu-ndo, chi nchaa cue téé ndècu ichi

Xítohó Jesucrístú xĩndecu mee ío ñùhu iní-güedé cada-güedé chiùⁿ-gá nàcuáa cudìu-güedé núú-gă.

³³ Te nchaa cue tée sa ndècu ñadìhí-xi cue tée ndècu ichi-gá ñùhu iní-güedé nàcuáa cada-güedé cundecu-güedé ñuyíú-a cuendá ducaⁿ cudìu-güedé núú ñadìhí-güedé.

³⁴ Te diu-ni ducaⁿ cùu tucu cue ñáyiu dìhí chi ñá túú ìⁿ-ni cuu ñáyiu sa ndècu yì-xi ndihì ñáyiu vátá cùndècu-gá yì-xi, chi ñáyiu ndècu ichi Xítohó Jesucrístú ñá túú ndèca tée ío ñùhu iní-yu cadá-yu chiùⁿ-gá nàcuáa ñihí ní ndúŷ-yu cundecu yìñùhú-yu núú Yă Ndiöxí, dico cue ñáyiu dìhí ndécá tée ndècu ichi-gá ío ñùhu iní-yu nàcuáa cundecú-yu ñuyíú-a cuendá cudìú-yu núú yí-yu.

³⁵ Te duha càháⁿ-í cuendá cúú-xí ìⁿ sá văha xii-ndo, te cudìu núú tnáhá-ndó, te cuu-ndo ñáyiu cada ndáá núú Xítohó Jesucrístú, te mee-ni-gă cuhuⁿ iní-ndó. Te ñá díú să dúhá càháⁿ-í te quide yica-í sá cadá-ndó nàcuáa càháⁿ-í.

³⁶ Te núu ìó dava-ndo sàni iní-ndó să ñà túú ndùu váha-xi sá ìo cuu sacuéhé dēhe yoco-ndo cundecú-yu ña, te núu sàni iní-ndó să văha-gá candecá-yu tée te cada-ndo nàcuáa sàni iní-ndó, chi ñá díú ìⁿ cuéchi cùu-xi.

³⁷ Te núu dava-ndo ndècu déhe yoco-ndo, te vá yō ìⁿ cada yica ñàha xii-ndo sá cándecá-yu tée. Te núu mee-ndo sàni váha iní-ndó nàcuáa cada-ndo, te núu vá dásáⁿ-ndó déhe yoco-ndo cãndeca ñaha tée te quide váha-ndo să dúcáⁿ quide-ndo.

³⁸ Te nchaa ñáyiu dàsaⁿ déhe yoco-xi cãndeca ñaha tée te váha-ni quidé-yu, te nchaa ñáyiu ñá túú

dàsaⁿ déhe yoco-xi càndeca ñaha téte te váha-gá tucu quidé-yu sá dúcáⁿ quidé-yu.

³⁹ Te nchaa ñáyiú ðíhí ndécú yíi-xi xini ñuhu-xi sá cúndècu-ní-yu ndíhi yíi-yu nini ndècu vívú-güedě chí ducaⁿ càháⁿ tnúhu sá dánèhé ñáhá xì-o nacuáa cada-o cùndecu-o, dico núu na cùú-güedé te cuu naquehéⁿ-yu ingá téte candecá-yu ðicó-ni sá ðiú-ni téte ndècu ichi Xítóhó Jesucristú.

⁴⁰ Te yúhú sání iní-í sá ðo-gá váha cundecú-yu te núu vá nándúcú-yu ingá téte candecá-yu, te duha càháⁿ-í chí Espíritú Yă Ndiöxí ducaⁿ dâcahu iní ñáhá-xí xì-í càháⁿ-í.

8

Cuendá nchaa sá nchító-ó sãñaha ñáyiú ndùu táhú nchaa sá càchí-yu cùu ndióxí

¹ Te vitna na càháⁿ-í cuendá nchaa sá nchító-ó sãñaha ñáyiú ndùu táhú nchaa sá càchí-yu cùu ndióxí te ñá ndàá chí ðicó ndaha cue tee ñuyíú-a ní cuáha nchaa xíãⁿ. Te nchoo sa cùtnuní váha iní-ó cuendá nchaa xíãⁿ, ðicó-ni sá cuendá nchaa sá cùtnuní váha iní-ó xíãⁿ quidé càhnu-o mee-o, dico núu cùu iní-ó tnàha ñáyiú-o te canu ichi-ö-yu ichi váha.

² Te núu dava-ndo sàni iní-ndó sã túha-ndo dico cùu-ndo ñáyiú vátá cútúha-gá nacuáa tàú-xi cundu.

³ Te núu nchòhó cúú iní-ndó Yă Ndiöxí te mee-gã càháⁿ-gá sá cúú-ndó ñáyiú cùu cuendá-gá.

⁴ Te vitna na càchí tnúhu-í xii-ndo nacuáa ndùu cuendá nchaa sá nchító-ó sãñaha ñáyiú ndùu táhú nchaa sá càchí-yu cùu ndióxí te ñá ndàá chí ðicó ndaha cue téte ñuyíú-a ní cuáha nchaa xíãⁿ. Te

nchoo cùtnuní iní-ó sǎ ncháá sǎ càchí ñáyiù cùu ndióxí cǎdúha-yu ñuyíú-a ñá túú cùu-xi ndióxí, chi ñⁿdii díí-ni Yá Ndióxí ndécú.

⁵ Te cue ñáyiù ñuyíú-a càchí-yu sá cuëi andiù te cuëi ñuyíú-a ndècu titní ndióxí. Te ndáá sá ndëni ní cuu ndècu espíritú sá càchí ñáyiù cùu ndióxí te ñá ndàá sá ndióxí cúú-xí, te nchaa xiǎⁿ táxí tnùní ñáhá-xí xíí-yu.

⁶ Te nchoo cùtnuní ndáá iní-ó sǎ ñⁿdii díí-ni Yá Ndióxí ndécú te ñiù-gá cúú-gǎ Tátá-ó, te nchoo cùu-o ñáyiù cùu cuendá-gá. Te ñiù-ni mee-gǎ ní táuchíúⁿ-gǎ ní cuáha nchaa sá ió ñuyíú-a, te cùtnuní tucu iní-ó sǎ ñⁿdii díí-ni Xítohó Jesucrístú ndécú, te Yaá-áⁿ ñí quide-gá nchaa chùⁿ ní táhú Dútú Ndióxí ní cadúha-gá nchaandi túhú sá ió ñuyíú. Te ñiù-ni mee Xítohó Jesucrístú quidé ndècu-o ichi-gá vitna.

⁷ Te ñá ncháá nchòhó ñáyiù ndècu ichi Xítohó Jesucrístú cùtnùní iní-ndó nàcuáa ndùu tnúhu càháⁿ-í. Chi sa ní cáaⁿ-ndo quide cahnu-ndo nchaa sá càchí-yu cùu ndióxí ní cùu. Te cuendá xiǎⁿ nùu nàqueheⁿ-ni-ndo nchaa sá nchító-ó ndùu táhú nchaa sá càchí-yu cùu ndióxí-áⁿ xéxí-ndó, te sàni-ni iní-ndó sǎ quidé cahnu-ndo nchaa sá càchí-yu cùu ndióxí-áⁿ te ñá ndàá sá ndióxí cúú-xí. Te nùu sàni iní-ndó sǎ ñá túú vǎha caxi-ndo sǎ dúcáⁿ ndùu táhú-xi-áⁿ te xèxi-ndo te xiǎⁿ ñá túú cùu vǎha iní-ndó cuendá sá dúcáⁿ quide-ndo.

⁸ Te ñá díú nchàa sá xéxí-ó quide-xi cudíu-o núú Yá Ndióxí, chi ñⁿ-ni quide-xi cuëi na càxi-o àdi vá cáxí-ó chi ni ñⁿ sá cáxí-ó vǎ chíndèe ñaha-xi cudíu-o núú Yá Ndióxí. Te cuëi vá cáxí-ó dico ñá díú xiǎⁿ cada sá vǎ cúdíu-o núú-gǎ.

⁹ Te cuu-ni caxi-ndo nchàa nání nìhí-ndó. Te

dìcò-ni sá càda cuendá-ndó sã ñà díú cuendá sá xéxí-ndó-ǎⁿ cuíta nihnu dava ñáyiú ndècu ndihí-ndo ichi Xítóhó Jesucrìstú cadá-yu nándi sá cadá-yu nàcuáa vá cúú vãha iní Yã Ndiõxí chi ñáyiú-áⁿ ñà túú cùtnuní iní-yu.

10 Te nchòhó ñáyiú xìní váha cuendá nchaa sá càchí-yu cùu ndiõxí, te núu na quihíⁿ-ndó núú ndécú nchaa xíáⁿ te ngóo-ndo càxi-ndo nchaa sá ñi cutáhú-xi, te quiní ñáyiú ndècu ndihí-ndo ichi Xítóhó Jesucrìstú, ñáyiú vátá cùtnùní-gá iní-xi nàcuáa ndùu cuendá nchaa sá dúcáⁿ càchí-yu cùu ndiõxí-áⁿ, te cuèi sàni iní-yu sá ñà túú quìde váha-ndo sã dúcáⁿ quìde-ndo te cudana te cada yicá-yu caxí-yu tnàhá-yu nchaa sá dúcáⁿ ñi nduu táhú nchaa sá càchí-yu cùu ndiõxí-áⁿ te ñà ndáá sá ndiõxí cúú-xí.

11 Te núu ducaⁿ cùtnuní iní-ndó nàcuáa ndùu cuendá nchaa xíáⁿ te ducaⁿ quìde-ndo, te sá dúcáⁿ quìde-ndo-áⁿ te dàcuíta nihnu-ndo dàva-gá ñáyiú ndècu ndihí-ndo ichi Xítóhó Jesucrìstú, ñáyiú vátá cùtnùní-gá iní-xi nàcuáa ndùu cuendá nchaa xíáⁿ, te ñi cuendá tnàhá ñáyiú-áⁿ ñi xihí Xítóhó Jesucrìstú.

12 Te sá dúcáⁿ quìde-ndo-áⁿ cúú-xí ñi cuéchi núú Xítóhó Jesucrìstú, chi quìde-ndo nàcuáa xínu iní-yu cadá-yu ñi sá sání iní-yu ñà túú vãha, núu xíáⁿ ñà túú quìde váha-ndo sã cúú-xí-yu.

13 Te núu yúhú cùtnùní iní-í sá sã cuendá ñi sá cáxi-í te ngóo ñi ñáyiú ndècu ndihí-í ichi Xítóhó Jesucrìstú cadá-yu ñi sá vã cúú vãha iní Yã Ndiõxí, te váha-gá sá vã cáxi-gã-í xíáⁿ cuendá sá vã cadá-yu ñi sá vã cúú vãha iní-gá.

9

Nchaa sá cúú càda cue téé ní táúchíúⁿ Xítóhó Jesucristú cáháⁿ tnúhu-gá

¹ Te yúhú chi cuu cada-í nchaa sá sání iní-í, chi tnàhá-í ní táúchíúⁿ Xítóhó Jesucristú cáháⁿ-í tnúhu-gá núú ñáyiú. Te yúhú ní xiní núú-í Xítóhó Jesucristú Yaá cúú Xítóhó-ó te nchòhó cúú-ndó ñáyiú ní sándáá iní tnúhu-gá sá càháⁿ-í te ducaⁿ chi ndècu ndihí-í-gá.

² Te íó dava ñáyiú ñá túú sándáá iní-yu sá Xítóhó Jesucristú ní táúchíúⁿ-gã cáháⁿ-í tnúhu-gá, dico nchòhó chi cùnùnì ndáá iní-ndó sã díú-gã ní tendaha ñàha-gá xii-í xícá cùu-í càháⁿ-í tnúhu-gá, te ducaⁿ chi yúhú ní cáháⁿ-í tnúhu-gá núú-ndó te ní sándáá iní-ndó-gã te xiãⁿ cùnùnì sá díú-gã ní tendaha ñàha-gá xii-í xícá cùu-í càháⁿ-í tnúhu-gá núú ñáyiú.

³ Te duha ndùu tnúhu càháⁿ-í cuendá cundedóho nchaa ñáyiú sàtnuhu ñaha xii-í.

⁴ Chi yúhú cuu-ni caxi-í nchaa núú sã cúú caxi-o na taxi ñáyiú.

⁵ Te cuu-ni cundecu ñadìhí-í te caca ndeca-í-yu nchaa núú xícá cùu-í càháⁿ-í tnúhu Yá Ndiõxí dàtná quidé dàva-gá cue téé càháⁿ tnúhu-gá, ndihí cue téé cùu ñaní Xítóhó Jesucristú, ndihí té Pèlú.

⁶ Te tnàhá yúhú ndihí té Bèè cuu dañà-ndí chùuⁿ quide-ndí te cada-ndí dàtná xíquide dava-gá-güedé càháⁿ-güedé tnúhu Xítóhó Jesucristú.

⁷ Te nchoo xiní-ó sã ncháá cuè sandadú dacuitíí sã ñúhú yáhu-güedé xínú cuèchi-güedé, te ñá túú dícó ducaⁿ xínu cuechi-güedé. Te ducaⁿ sàtnahá-xi cùu tucu ñáyiú xítu ñⁿ sá xítú chi dacuitíí nihí-yu

ɨⁿ sá xítũ-yu xèxí-yu, te ñá díú dìcò ducaⁿ xítú-yu. Te ducaⁿ cùu tucu cue tée cùu toli chi quìhni-güedé dícu quiti xìto-güedé xìhi-güedé te ñá túú dìcò ducaⁿ xìto-güedé-di.

⁸ Te vá cání iní-ndó sǎ sà dúhá càháⁿ-í te càhu iní méè-í duha càháⁿ-í, chi tnúhu càháⁿ-í-a ɨⁿ-ni quèe-xi ndíhi tnúhu ní cáháⁿ ndíi Moisés.

⁹ Chi ndíi-áⁿ ñí chídó tnùní ndíi núú tütú ndíi nàcuáa ní xáhaⁿ Yǎ Ndiǒxí xii ndíi, te càchí-xi: “Vá chíhí-ndó ñunu yuhu ndicutu oré dánchezí-di triú”, duha càchí-xi núú tütú ndíi. Te ñá díú sǎ dúcáⁿ ñí cáháⁿ Yǎ Ndiǒxí te càháⁿ-gá mee-ni cuendá ndicutu-áⁿ.

¹⁰ Chi ní cáháⁿ-gá cuendá nchoo cuè ñáyiú ndècu ichi-gá, te ndáá sá díú cuendá-ó dùcaⁿ ní cáháⁿ-gá. Te nchaa cue tée xítu chíhi tatá sàni iní-güedé sá díú tàtá chíhí-güedě-áⁿ cuu sá cáxí-güedě, te diu-ni ducaⁿ cùu tucu cue tée xícani triú chi càni-güedé cuendá quee caxi-güedé.

¹¹ Te ducaⁿ sǎtnahá-xi cùu nchúhú cue tée càháⁿ tnúhu Xítóhó Jesucristú, chi dǎnehé ñáhá-ndí xii-ndo cuendá nchaa sá vǎha quìde ñaha Yá Ndiǒxí xii-o, núu xǎⁿ dai tàú-xi sá nchòhó chindee ñaha-ndo xii-ndí nũu ná cúú sǎ xíní ñùhu-ndí.

¹² Te núu dava cue tée càháⁿ tnúhu Yá Ndiǒxí chíndèe-ndo-güedé, te uuⁿ-gá ducaⁿ tàú-ndó chindee-ndo nchúhú cue tée ní sanu ichi ñaha xii-ndo ichi-gá.

Te cuèi tàú ndisa-ndo sǎ chíndèe ñaha-ndo xii-ndí dico ñá túú dùcaⁿ caháⁿ-ndí núú-ndó càda-ndo, te quìde cahnu iní-ndí cuèi nándi sá tá yǎha-ndí véxi. Te ducaⁿ quìde-ndí cuendá sá ñà túú ñǎ cani iní ñáyiú cuendá-ndí te ducaⁿ cuíta

cuténuu-gá tnúhu sá cãháⁿ nãcuáa naníhí tãhú-ó quĩhíⁿ.

13 Te nchòhó xìní-ndó sã ncháá cuè tée xìnu cuechi veñúhu ñi-u-ni xíáⁿ ñihí-güedé xéxí-güedě, te ñi-u-ni cue tée-áⁿ xínú cuèchi-güedé núú xihí quiti ndùu tãhú Yã Ndiõxí, te ñi-u-ni xíáⁿ ñihí tucu-güedé sá xéxí-güedě.

14 Te ñi-u-ni ducaⁿ sãtnahá-xi cùu nchúhú cue tée cãháⁿ tnúhu sá cãháⁿ nãcuáa naníhí tãhú-ó, chi Xítohó Jesucrístú ní cachí-gá sá díú-ní cuendá chùuⁿ quide-ndí ñihí-ndĩ caxi-ndí.

15 Te ñã ĩⁿ ndùu cãháⁿ-í núú-ndó càda-ndo nacuáa tàú-xi cunduu sá cúú-xì-í, te vá cáni ñi-ndó sã sã dúhá cãháⁿ-í te ĩⁿ sá xìcáⁿ-í núú-ndó. ¡Chi cuèi na cùú-í sá ndóhò-í te ñã díú sã cãháⁿ ñáyiu sá sã cuendá sá cãháⁿ-í tnúhu Xítohó Jesucrístú ñihí-í xéxì-í!

16 Te yúhú ñã túú quide cahnú-í mée-í sá cãháⁿ-í tnúhu sá cãháⁿ nãcuáa naníhí tãhú-ó, chi tàú tnàhá-í sá càdà-í chi ducaⁿ ñĩ cachí Yã Ndiõxí cada-í. ¡Te ndàhú ní cuu yúhú te núu vá cãháⁿ-í tnúhu-áⁿ!

17 Te ñã túú cãháⁿ-í tnúhu-gá sá cúú ñi mée-í chi mee-gã ní táuchíuⁿ-gã cãháⁿ-í tnúhu-gá. Te núu cãháⁿ-í tnúhu-gá sá cúú ñi mée-í te tàú-í ñihí-í sá ndúú tãhù-í ní cùu.

18 Dico sá sã ní nduu tãhù-í cúú-xí sã ïo cùdíi ñi-í sá dicó ducaⁿ cãháⁿ-í tnúhu sá cãháⁿ nãcuáa naníhí tãhú-ó. Te cuèi tàú-í queheⁿ-í sá táxi-ndó ndùu tãhù-í sá cuendá sá cãháⁿ-í tnúhu Xítohó Jesucrístú, dico ñã túú dùcaⁿ quide-í.

19 Te sá dúcáⁿ dicó ducaⁿ cãháⁿ-í tnúhu sá cãháⁿ nãcuáa naníhí tãhú-ó, xíáⁿ ni ĩⁿ ñáyiu ñuyíú-a vá

cúú cächí-yu sá táxí tnùní ñáhă-yu xii-í, te cuëi ducaⁿ dico mee-ĩ ní sani iní-í sá cúù-í dàtná ñⁿ téé xìnu cuechi núú nchàa ñáyiú cuèndá ducaⁿ cuíta cuu vaí-yu tuhá-yu ichi Xítóhó Jesucrìstú quíhíⁿ.

20 Te òré ñúhú tnàhí tnuú cue ñáyiú isràél te quide-í sá ñⁿ-ní cùu-í ndihí-yu cuëi ñá túú nchìcúⁿ nihnu-í tnúhu ní cáháⁿ ndíi Moisés, te ducaⁿ quide-í cuèndá sá ñáyiú-áⁿ quìndáá iní-yu tnúhu càháⁿ-í te tuhá-yu ichi Xítóhó Jesucrìstú.

21 Te òré ñúhú tnàhí tnuú nchaa ñáyiú ñá túú nchìcúⁿ nihnu tnúhu ní cáháⁿ ndíi Moisés, te quide-ni-í sá quidè-í dàtná quidé mèé-yu cuèndá quìndáá iní-yu tnúhu càháⁿ-í, te tuhá-yu ichi Xítóhó Jesucrìstú. Te cuëi ducaⁿ quide-í dico ñá túú dàña ndeé-í quidè-í nchaa nàcuáa cuìní Yă Ndiôxí cada-o, te ducaⁿ chi nchìcúⁿ nihnu-í quidè-í nchaa nàcuáa càháⁿ Xítóhó Jesucrìstú.

22 Te òré ndécù-í ndihí nchaa ñáyiú ñá túú cùtnuní váha iní-xi nàcuáa cundecu ichi Xítóhó Jesucrìstú, te tnàhá-í quidè-í dàtná quidè-yu cuèndá sá ná tédóho-yu nchaa tnúhu càháⁿ-í te ducaⁿ cùtnuní-gá iní-yu nàcuáa cundecú-yu ichi-gá. Te nchaandi túhú ñáyiú quide-í sá ñⁿ-ni cuu-í ndihí-yu cuèndá ducaⁿ ñhì-í nàcuáa cada-í te cundedóho-yu tnúhu càháⁿ-í te tñí-yu ichi Xítóhó Jesucrìstú te naníhí tàhú-yu.

23 Te duha quide-í cuèndá sá cuítá quìndáá iní-yu tnúhu sá càháⁿ nàcuáa naníhí tàhú-ó quíhíⁿ, te ducaⁿ te tnàhá yúhú ío váha cundecu-í dàtná càháⁿ tnúhu-áⁿ.

24 Te nchòhó sa xìní-ndó sã ncháá cuè téé xìnu quíhu màrcúhyú nchaa-güedé xínú-güedě, dico

ɛ̃ⁿ-ni-dé cúú t̃e ndàcu ngodó núú te t̃e-áⁿ cúú t̃e nìhí sá ndúú t̃áhú-xi, te ducaⁿ x̃ini ñuhu-xi cada nchohó tucu chi cada-ndo nchàa nacuáa cuìní Yă Ndiõxí cada-ndo cuendá ducaⁿ nìhí-ndó sã ndúú t̃áhú-ndó.

²⁵ Te nchaa cue t̃e x̃ini dadìqui te váha váha quide cuendá-güedé ñu ná cúú sã cáda t̃neñu te xòcani-güedé cuendá sã ñà díú x̃iãⁿ cada te cuíta-güedé òré dadìqui-güedé. Te ducaⁿ quide-güedé cuendá cuìní-güedé nìhí-güedé sá ndúú t̃áhú-güedé, te sá ndúú t̃áhú-güedé-áⁿ cúú-xí ɛ̃ⁿ sá ndíhí ñhnu ñuyíú-a. Dico nchoo ndùcu ndee-o quide-o nacuáa nìhí-ó sã ndúú t̃áhú-ó, te x̃iãⁿ cudí-xi cundecu ndihí-o ñi caa ñi quíhíⁿ.

²⁶ Te yúhú quidè-í dàtná quidé cuè t̃e x̃inu, chi cue t̃e-áⁿ x̃ini-güedé núú quèxiò-güedé, te quide tucu-í dàtná x̃iquide cue t̃e sa ní cutúha nàá, te ñá túú quide-í dàtná quidé cuè t̃e vitna d̃acuaha naá. Te ducaⁿ chi yúhú quidè-í nchaa ñacuáa cuìní Yă Ndiõxí cunduu.

²⁷ Te yúhú ñá túú dàña-í taxi t̃nùnì ñáhá ñi ɛ̃ⁿ sá cuèhé sá dúhá x̃i-í chi yòtñi-í méè-í. Te ducaⁿ quide-í chi yúhú càháⁿ-í t̃núhu Xítohó Jesucristú núú ñáyiu, te cuìní-í sá ṽa cuíta sá ñi cachí Yă Ndiõxí nduu t̃áhú-í.

10

Cuendá nchaa sã ñi cadúha cue t̃e ñuyíú-a quide cahnu ñáyiu

¹ Te nchòhó ñáyiu ndècu ndihí-í ichi Xítohó Jesucristú na càhí t̃núhu-í xii-ndo cuendá nchaa ñaní t̃nàhá-nd̃i ñáyiu isràél ní x̃indecu ndéé sanaha, chi vitna t̃nàhá nchòhó cúú-ndó dàtná cue ñaní t̃nàhá

nchàa ñáyiú-áⁿ chi ndècu-ndo ichi-gá. Te nchaa ñáyiú-áⁿ ñí taxi ndecu Yá Ndiöxí ñⁿ vícò ñí dánèhé ñáhá-xí xií-yu ichi quíhíⁿ-yu, te ní quée dava ndute làmár nání Mǎr Tícuèhé te nchaá-yu ní yáha-yu.

² Te sá dúcáⁿ ñí cuu te nchaá-yu ñⁿ-ná ní cuú-yu ndíhi ndíi Moisés, te ní xíhi ndaha ñàha ndíi xií-yu.

³ Te nchaá-yu ní xexí-yu sá ñí sáñaha Yǎ Ndiöxí xií-yu.

⁴ Te ducaⁿ nchàa tucú-yu ní xihí-yu ndute sá ñí sáñaha-gǎ xií-yu, ndute sá ñí quee yiqui nàha cava. Te cava-áⁿ cada iní-ó sǎ cúú-xí dàtná Xítóhó Jesucristú te ducaⁿ chi ndíhi ñaha-gǎ xií-yu ichi cuáháⁿ-yu dàvá-áⁿ.

⁵ Dico ío vǎi-yu ñá túú ní quidé-yu nàcuáa càháⁿ Yǎ Ndiöxí, te xǎⁿ ñá túú ní cùu váha iní ñáhá-gǎ xií-yu. Te sá dúcáⁿ ñí quidé-yu núu xǎⁿ òré ñúhǔ-yu ichi cuáháⁿ-yu xiti yucu ío vǎi-yu ní xíhi.

⁶ Te ducaⁿ ñí cuu cuèndá nchoo vǎ cǎnchícúⁿ nihnu-o càda-o nacuáa ní quidé-yu, chi ñáyiú-áⁿ mee-ni nchàa sá cuèhé sá dúhá ñí sani iní-yu ní quidé-yu. Te nchoo xini ñuhu-xi sá vǎ dúcáⁿ càda-o.

⁷ Te yúhú càháⁿ-í dóho-ndo sǎ vǎ quèndáá iní-ndó te ni vǎ cadá càhnu-ndo ni ñⁿ sá cǎchí-yu cùu ndióxí ní cadúha cue téé ñuyíú-a dàtná ní quide cue ñaní tnáhá-ndǎ ní xíndecu ndéé sanaha. Chi ñáyiú-áⁿ ñí quidé-yu dàtná càháⁿ-xi núú tütú Yǎ Ndiöxí núú cǎchí-xi: “Nchaa ñáyiú ní xexí-yu ní xihí-yu ní quidé-yu vico, ní quide cǎhnú-yu sá cǎchí-yu cùu ndióxí ní cadúha-yu te ñá ndàá sá ndiöxí cúú-xí”, duha cǎchí-xi núú tütú-gá.

⁸ Te ni vǎ cùndècu-ndo ichi díí ñí dàtná ní quide dava ñáyiú-áⁿ, chi sá dúcáⁿ ñí quidé-yu te ní xíhi

óco úní mĩl-yu ìⁿ-ni ndùu.

⁹ Te vá cánì iní-ndó sã sà cáhnú iní Yã Ndiõxí te nándì sá cuèhé sá dúhá càda-ndo cuendá cuìní-ndó quìní-ndó nũu nása cada ñaha-gã xii-ndo, chi ñáyiu ní xíndecu ndéé sanaha-ãⁿ ducaⁿ ñí xóo cadá-yu, te ní xíhí-yu ní xexihaⁿ cõó.

¹⁰ Te ni vã càháⁿ cuèhé-ndó cuendá Yã Ndiõxí, chi dava ñáyiu ní xíndecu ndéé sanaha-ãⁿ ducaⁿ ñí quidé-yu ní cáháⁿ cuèhé-yu cuendá-gá te ní quixi espíritú xínú cuèchi núú-gã ní sahani ñaha-xi xii-yu.

¹¹ Te ducaⁿ ñí cuu te ducaⁿ ñí ngúndéé núú tütú Yã Ndiõxí cuendá dacuàha-o vitna ta cuyatni nduu naa ñuyíú-a. Te nchaa tnúhu sá ñí ngódó tnùní-áⁿ càháⁿ dóho ñaha-xi xii-o cuendá sá vã cadá-ó dàtná ní quide ñáyiu-áⁿ.

¹² Te xíãⁿ nũu nchaa nchòhó ñáyiu sàni iní sá ïo váha cùndáá ndécú ìchi Xítohó Jesucristú cada cuendá-ndó sã dúcáⁿ-ní cùndáá-ndó nũú-gã, te vá dáná cuendá-ndó càda-ndo sá ñà túú cùu váha iní Yã Ndiõxí.

¹³ Te ñiu-ni dàtná quidé sàcuíhná dácàháⁿ-xi iní nchaa dava-gá ñáyiu nándì quidé-yu, te ñiu-ni ducaⁿ quide ñaha-xi xii-ndo. Dico mee Yã Ndiõxí cúú-gã Yaá quidé ndää chi quide-gá nchaa sá càháⁿ-gá, te ñã dáñá-gã sá sũúni cuídó sàcuíhná coto ndéé ñáhá-xí xii-ndo, chi není-ni nàcuáa cùndee iní-ndó dàña-gá ducaⁿ quide ñaha-xi xii-ndo. Te ñiu-ni-gá chindee ñàha-gá xii-ndo cùndee iní-ndó vã cadá-ndó cuèi nándì sá ná dàcahu iní ñáhá-xí xii-ndo.

¹⁴ Te xíãⁿ nũu càháⁿ-í dóho nchòhó ñáyiu ío cùu iní-í sá vã quíndáá iní-ndó ñí ìⁿ sá càchí-yu cùu ndiõxí te ñã ndää chi dìcò ndaha cue téé ñuyíú-a ní cuáha nchaa xíãⁿ, te ni vã cadá càhnu-ndo.

15 Te duha càháⁿ-í chi cùu-ndo ñáyiú tècú tnùnì, te mee-ndo ìo vâha cuâha-ndo cuendá te núu vâha-ni càháⁿ-í àdi ñá túú vâha-ni.

16 Te nchoo ndàcáⁿ táhú-ó núú Yă Ndiöxí cuendá ndudí ndéhé yoho yâha stilé sá xihí-ó, te sá dúcáⁿ xihí-ó ndudí ndéhé yoho yâha stilé-áⁿ, te xiăⁿ ndácú ìní-ó sã ĩⁿ-ní cùu-o ndihì Xítóhó Jesucristú cuendá sá ñi sati ñĩí-gă ní xihí-gá núú cùrúxí, te ðiú-ni ducaⁿ sãtnahá tucu-xi cùu paá sá xéxí-ó òré xihí-ó ndudí ndéhé yoho yâha stilé-áⁿ, chi sá dúcáⁿ xèxi-o paá-áⁿ xiăⁿ ndácú ìní-ó sã ĩⁿ-ní cùu-o ndihì Xítóhó Jesucristú sá cuendá yiqui cùñú-gá.

17 Te cuēi vâi vihi-o dîco ĩⁿđii-ni paá xéxí-ó, te sá dúcáⁿ ĩⁿđii-ni paá xéxí-ó xiăⁿ ndácú ìní-ó sã ĩⁿ-ní cùu-o ndihì Xítóhó Jesucristú.

18 Te cada cuendá-ndó nâcuâa quide ñáyiú isrâél, chi ñáyiú-áⁿ xéxí-yu sá ndúú tâhú Yă Ndiöxí. Te sá dúcáⁿ quide-yu-áⁿ cútnùnì ìní-ó sã tnâhá tnúhu-yu ndihì-gá.

19 Te vá cânì ìní-ndó sã sâ dúhá càháⁿ-í te cachí-ndó sã cùnuu nchaa sá càchí-yu cùu ndiöxí ní cadúha cue téē ñuyíú-a chi ñá túú nă cúú ñi ĩⁿ nchaa xiăⁿ. Te ðiú-ni ducaⁿ cùu tucu nchaa sá sãñaha ñáyiú ndùu táhú-xi chi ñá túú cùnuu-xi, chi ĩⁿ-ni cùu-xi ndihì nchaa dava-gá sá xéxí-ó.

20 Te yúhú càchí-í sá sã dúcáⁿ quide nchaa ñáyiú ñá túú tnâhá tnúhu ndihì Yă Ndiöxí, te ðicó nchaa espíritú cúndihì yucu ñávâha sãñahá-yu sá ndúú tâhú-xi sá dúcáⁿ quide-yu. Te ñá ðíú Yă Ndiöxí sãñahá-yu sá ndúú tâhú-gă. Te yúhú cuñí-í sá vâ tnâhá tnúhu-ndo ndihì cue espíritú cúndihì yucu ñávâha.

21 Te ducaⁿ chi vá cúú tnàhá tnúhu-o ndìhi cue espíritú cùndìhi yucu ñávãha te tnahá tnúhu-o ndìhi Xítóhó Jesucristú, te ñá túú ndùu váha-xi ngóo càxi-o coho-o sá ndúú tãhú cue espíritú cùndìhi yucu ñávãha-áⁿ, te ngóo càda-o nacúáa ní dándõo tnúhu Xítóhó Jesucristú coho-o ndúdí ndéhé yoho yàha stilé, te caxi-o pàá cada-o sã ndácú ìní-ó sã ñí xíhí-gá núú cùrúxí.

22 Te vá cání ìní-ó dùcaⁿ cada-o cuendá sá vã cùdéeⁿ Yã Ndiõxí, chi ñá túú ñã càhnu cuu-o núu cada-o ñãni véxi ìní mée-ó, chi mee-gã ío càhnu cuu-gá.

Cada-o nchàa nacúáa cuu càhnu Yã Ndiõxí

23 Te ndáá sá ncháá sã cuìní-ó càda-o te cuu cada-o dico ñá ncháá cùu-xi sá vãha sá cúú-xí-ó, te ñí ñã ncháá-xí chìndee ñaha-xi nacúáa níhí ndée-gã-ó cùndecu-o ìchi Xítóhó Jesucristú.

24 Te xìni ñuhu-xi sá cádá-ó sã vãha sá cúú-xí tnàha ñáyiu-o te ñá díú mèe-ni sá cúú-xí mèe-o cada-o.

25 Te nchòhó cuu caxi-ndo nchàa cuñú sá cùyãhu cuñú sá xìní caxi-ndo, te vá ndúcú tnúhu-ndo te núu cùu-xi cuñú sá ñí nduu táhú sã càchí-yu cùu ndiõxí. Te ñá túú ñã caní ìní-ndó càxi-ndo,

26 chi ñuyíú-a ndìhi nchaa sá ìo cúú-xí cuendá Yã Ndiõxí.

27 Te núu ìⁿ ñáyiu ñá túú ndècu ìchi Xítóhó Jesucristú càháⁿ ñãhã-yu xii-ndo quíhíⁿ-ndó càxi-ndo dítá vehé-yu, te núu sàni ìní-ndó sã quíhíⁿ-ndó te cuu quíhíⁿ-ndó te caxi-ndo cuèi náí cùu sá táxí-yu dico vá càcáⁿ tnúhú-ndó nũ-yu núu ndée ní níhí-yu, te ducaⁿ te cuu váha ìní-ndó càxi-ndo.

28 Te núu ìⁿ ñáyiú càchí-yu sá xǎⁿ cúú-xí sǎ ñí nduu táhú sǎ càchí-yu cùu ndiǒxí te vá cǎxí-ndó cuendá sá ñáyiú ducaⁿ cǎháⁿ-áⁿ cuu váha iní-yu te ñá túú tnàhí ná cani iní-yu.

29 Te yúhú cǎháⁿ-í cuendá nàcuáa sàni iní mée ñáyiú ducaⁿ cǎháⁿ-áⁿ te ñá díú sǎ nàcuáa sàni iní mée-ndó quide-ndo.

Te dava-ndo cǎchí-ndó: “Cuu-ni cada-o nchàa nacuáa sàni iní mée-ó cuèi dava-gá ñáyiú sàni iní-yu sá ñà túú ndùu váha-xi sá dúcáⁿ càda-o”, duha cǎchí-ndó.

30 Te cǎchí tucu-ndo: “Ñá túú tàú-xi cǎháⁿ cuèhé ñáyiú cuendá-ó sǎ cuendá nchaa sá xéxí-ó chi ndàcáⁿ táhú-ó núú Yǎ Ndiǒxí òré xéxí-ó”, duha cǎchí-ndó.

31 Te cuèi nándi sá xìní caxi-ndo ñihí-ndó xèxi-ndo àdi quide-ndo, te cada-ndo nàcuáa cǎháⁿ váha ñáyiú cuendá Yǎ Ndiǒxí.

32 Te vá cǎdá-ndó sǎ ñà túú tàú-ndó càda-ndo cuendá sá vá cǎdá ñáyiú ìⁿ sá ñà túú cùu váha iní Yǎ Ndiǒxí. Te ni sǎ cúú-xí cuè ñáyiú isràél, te ni sǎ cúú-xí cuè ñáyiú ñá túú cùu ñáyiú isràél, te ni sǎ cúú-xí cuè ñáyiú ndècu ichi-gá vá dúcáⁿ càda-ndo sá cúú-xí-yu.

33 Te yúhú ío ndùcu ndee-í quidè-í nàcuáa cudùu-í núú nchàa ñáyiú, te quide-í sá váha sá cúú-xí-yu, te ñá túú quide-í mee-ni sǎ cúú-xí mée-í. Te ducaⁿ quide-í cuendá quíndáá iní-yu tnúhu Xítóhó Jesu-crístú te naníhí tàhú-yu.

11

¹ Te chí cǎnchìcúⁿ ñihnu cada-ndo nchàa nacuáa quide-í nchìcúⁿ ñihnu-í nchaa nàcuáa quide Xítóhó

Jesucrìstú.

Nàcuáa tàú-xi cada nchaa ñáyiú ðìhí núú tàcá-yu dàcuahá-yu tnúhu Yá Ndiöxí

² Te nchòhó ñáyiú ndècu ndìhi-í ichi Xítóhó Jesucrìstú càchí tnúhu-í xii-ndo sã ïo cùdìí ìní-í, chi ndàcu ìní ñáhá-ndó xii-í, te quìde-ndo nchaa nacuáa ní dánèhé ñáhà-í xii-ndo.

³ Te cuìní-í sá nchòhó cutnùní ìní-ndó sã ì^{ndii}-ni Yá Ndiöxí cúú-gã Yaá cùnùu taxi tnuní ñáhá xii Xítóhó Jesucrìstú, te ducaⁿ Xítóhó Jesucrìstú ì^{ndii}-ni-gá cùnùu taxi tnuní-gá nchaa cue téé, te nchaa cue téé ðiú-ni mee-güedë cùnùu-güedé táxí tnùnì-güedé ñadìhí-güedé.

⁴ Te núu nchoo cuè téé na dàdáhu-o ðíquí-ó òré càháⁿ-ó núú ñáyiú tnúhu sá dácàhu ìní ñáhá Yá Ndiöxí xii-o àdi oré càháⁿ ndìhi-o-gã, te ìⁿ sácáⁿnúú cúú-xí te núu ducaⁿ na càda-o dadáhu-o ðíquí-ó.

⁵ Dico núu ñáyiú ðìhí vá dadáhu-yu ðíquí-yu òré càháⁿ ndìhí-yu Yá Ndiöxí, àdi oré càháⁿ-yu tnúhu sá dácàhu ìní ñáhá-gã xií-yu núú tnàhá ñáyiú-yu, te sácáⁿnúú cúú-xí te núu vá dadáhu-yu ðíquí-yu, chi ìⁿ-ni cùu-xi te núu na dèté ndìí-yu ðíquí-yu.

⁶ Te núu ñá túú cuìní cue ñáyiú ðìhí dàdáhu-yu ðíquí-yu te váha-gá sá ná dèté ndìí-yu ðíquí-yu. Te núu cùcahaⁿ núú-yu sá dèté ðíquí-yu te váha-gá sá ná dàdáhu-yu ðíquí-yu.

⁷ Te nchoo cuè téé vá cúú dàdáhu-o ðíquí-ó òré càháⁿ ndìhi-o Yá Ndiöxí ñi òré càháⁿ-ó tnúhu sá dácàhu ìní ñáhá-gã xii-o núú ñáyiú chi dìhna-gá-ó ñí cadúha ñaha Yá Ndiöxí xii-o, te ní taxi ndecu-gá

nchaa sá xìní tñùn-ó dàtná ndécú nchàa sá xìní tñùní méé-gă. Te ducaⁿ ñi quide-gă chi cuìní-gă sá nchóó càda-o nacuáa cáháⁿ nchaa dava-gă ñáyiú sá ïo càhnu cuu-gă, te cue ñáyiú dìhí quidě-yu nàcuáa cunuú nchòo cue téé.

⁸ Te Yá Ndiöxí ní cadúha-gă téé, dico ñá díú yìquì naha ñadihí ní quènehe-gă ní cadúha-gă téé chi yìquì naha téé ní quenehe-gă ní cadúha-gă ñadihí.

⁹ Te sá cuendá téé ducaⁿ ñi cadúha-gă ñadihí-áⁿ te ñá díú sã cuendá ñadihí ní cadúha-gă téé.

¹⁰ Núu xíãⁿ tàú-xi sá ncháá ñáyiú dìhí dàdáhu-yu díquì-yu cuendá ducaⁿ cùtnuní sá ñà túú cùnuú-yu dàtná cùnùu nchoo cue téé. Te ducaⁿ xìní ñuhu-xi cadá-yu sá cuendá nchaa espíritú xínú cuèchi núú Yá Ndiöxí.

¹¹ Te vitna nchoo ñáyiú ndècu ichi Xítóhó Jesu-crístú, vá càchí-ó sã cuè téé ñá túú xìní ñuhu-güedé cue ñáyiú dìhí chindee ñàhá-yu, te ni vã càchí-ó sã cuè ñáyiú dìhí ñá túú xìní ñuhú-yu cue téé chindee ñàha-güedé xii-yu.

¹² Te ìⁿ yìquì naha téé ní queñuhu Yá Ndiöxí ní cadúha-gă ñadihí, dico vitna chi ñáyiú dìhí dácàcú-yu téé. Te téé, ñadihí ní cadúha Yá Ndiöxí, te ñi-ni ducaⁿ ñi cadúha-gă nchaa dava-gă sá ïó.

¹³ Te mee-ndo càda cuendá-ndó te núu ndùu váha-xi sá vã dádãhu cue ñáyiú dìhí díquì-yu òré càháⁿ ndihí-yu Yá Ndiöxí àdi ñáhá.

¹⁴ Te nchaa ñáyiú càháⁿ-yu sá ñà túú ndùu váha-xi sá cuè téé cunduú nàni idi díquí-güedě, chi ìⁿ sácáⁿnúú cúú-xí càchí-yu.

¹⁵ Te nchaa ñáyiú dìhí ñáyiú nàni idi díquí-xi càchí

ñáyiú sá ìⁿ sá vǎha cùu-xi sá cúú-xǐ-yu sá dúcáⁿ nàni idi díquǐ-yu. Te ducaⁿ chi Yá Ndiòxí ní cachí-gá sá dúcáⁿ cùnduú-yu cuendá quidáhu-xi díquǐ-yu.

16 Te núu ió ñáyiú cuení dacàá cuendú cuendá sá ñí cáháⁿ-í-a, te na cùnahá-yu sá ncháá nchùhú cue tée càháⁿ tnúhu Xítóhó Jesucristú ñu-ni ducaⁿ sàni iní-ndí cada nchaa ñáyiú ñíhí. Te ñu-ni ducaⁿ sàni iní nchaa ñáyiú ndècu ichi-gá.

Cuendá ñáyiú ñá túú quide datná ní quide Xítóhó Jesucristú cùtnàhá ní cudìni-gá ndìhi cue tée ní xica cuu ndìhi-gá

17 Te nchòhó ñá túú quide váha-ndo ndècu-ndo núu xǐⁿ duha na càháⁿ-í dóho-ndo, chi nchòhó òré tàcá-ndó ñá túú quide váha-ndo chi ñá túú chindee tnaha-ndo cada-ndo sá vǎha, chi da nàdatuhú iní tnáhá-ndó nàcuáa ndècu-ndo.

18 Te díhna-gá na càchí tnúhu-í xii-ndo sǎ ñíhí-í tnúhu sá òré tàcá-ndó quide-ndo nacuáa ní cáháⁿ Xítóhó Jesucristú, te ñá túú cùu ìⁿnuu-ndo oré ducaⁿ quide-ndo nacuáa ní cáháⁿ-gá. Te dava sá càháⁿ ñáyiú sàndáá iní-í te dava ñáhá.

19 ¡Te ndáá sá dúcáⁿ tnàhí cada-xi vá cúú ìⁿnuu-ndo cuendá ducaⁿ cùtnuní ñúu ndèdacàa-ndo sàndáá ndisa iní-ndó tnúhu Xítóhó Jesucristú te ndèdacàa-ndo ñáhá!

20 Te ndi tnahá òré tàcá-ndó quide-ndo datná ní quide Xítóhó Jesucristú cùtnàhá ní cudìni-gá ndìhi cue tée ní xica cuu ndìhi-gá, te ñá túú quide-ndo nacuáa tàú-xi cunduu chi cùtexínu-ni quide-ndo.

21 Chi òré tàcá-ndó quide-ndo nacuáa ní cachí Xítóhó Jesucristú, te dava-ndo ngòdó núú-ndó díhna-gá-ndó xèxi-ndo sá néhé-ndó te ñá túú sǎ

cúndetu tnaha-ndo, te ñá túú càháⁿ tnáhá-ndó nõu xíãⁿ dava-ndo ñà túú xèxi-ndo ndahá xití-ndó, te dava-ndo xidó-ndó quide-ndo chi xini-ndo.

²² Te vá dúcáⁿ càda-ndo chi càa vehe-ndo núú dúcáⁿ càxi-ndo coho-ndo cada-ndo ndéé ndahá xití-ndó, chi sá dúcáⁿ quide-ndo te dàquee tihú-ndó nchàa dava-gá ñáyiú ndècu ndihí-ndo ichi Yá Ndiõxí, te dàndóo canúú-ndó nchàa ñáyiú ndàhú sá dúcáⁿ quide-ndo. ¡Núu xíãⁿ vá cúú càchí-í sá cúú-ndó ñáyiú quide váha chi ñá túú quide váha-ndo sã dúcáⁿ quide-ndo ndecu-ndo!

Xítohó Jesucrístú ní dándõo tnúhu-gá sá cóhó-ó ndùdí ndéhé yoho yàha stilé te caxi-o pàá cuendá ndacu iní-ó sã ñí xihí-gá

(Mt. 26:26-29; Mr. 14:22-25; Lc. 22:14-20)

²³ Te dàtná-ni ní dánèhé ñáhá Xítohó Jesucrístú xii-í te diu-ni ducaⁿ ñí dánèhé ñáhà-í xii-ndo, chi diu-ni niú cútnáhá ní sáha cuendá ñáhá ndí Judás Iscarioté xii-gá núú cuè téé cùu úhú iní ñáhá ñí queheⁿ-gá pàá,

²⁴ te ní ndacáⁿ táhú-gã núú Yã Ndiõxí, te ní táhú cuèchi-gá, te ní xáhaⁿ-gã xii cue téé xica cuu ndihí-gá: “Chí quéhéⁿ pàá-a caxi-ndo te cada iní-ndó sã cúú-xí dàtná yiqui cùnú-í, chi yúhú cuú-í sácùendá-ndó. Te ducaⁿ-ni càda-ndo cundecu-ndo cuendá ndacu iní ñáhá-ndó xii-í”, càchí-gá xãhaⁿ-gã xii-güedé.

²⁵ Te sátá ñí yáha ní xexi-güedé pàá sá ñí sãñaha-gã, te ní queheⁿ-gá tàsáⁿ ñúhú ndùdí ndéhé yoho yàha stilé, te ní ndacáⁿ táhú tùcu-gá núú Yã Ndiõxí. Te ní xáhaⁿ-gã xii cue téé xica cuu ndihí-gá: “Chí cóhó ndùdí ndéhé yoho yàha stilé-a,

te cada iní-ndó sǎ cúú-xí dàtná níñi-í, te cuendá níñi-í sǎ cáti òré cuú-í cutnùní ndáá sǎ Yǎ Ndiõxí cada-gá ingá núú sǎ vǎha sǎ cúú-xí ñǎyiu. Te ndi tnahá òré coho-ndo ndùdí ndéhé yoho yàha stilé-án te ndacu iní ñáhá-ndó xii-í, te ducaⁿ-ni càda-ndo cundecu-ndo”, cachí-gá xǎhaⁿ-gǎ xii-güedé.

²⁶ Te ndi tnahá òré xéxi-ndó pàá te xìhi-ndo ndudí ndéhé yoho yàha stilé, te xǎⁿ dátùu-ndo núú ñǎyiu sǎ Xítóhó Jesucristú ní xíhí-gá cuendá-yu, te ducaⁿ-ni càda-ndo cundecu-ndo ndéé ná sǎá nduu quixi tucu Xítóhó Jesucristú.

Nàcuáa cada-o òré caxi-o pàá ndihi òré coho-o ndùdí ndéhé yoho yàha stilé dàtná ní cachí Xítóhó Jesucristú

²⁷ Te dava-ndo ñà túú quide-ndo nacuéa cuini Yǎ Ndiõxí cada-ndo òré xéxi-ndó pàá ndihi òré xíhí-ndó ndùdí ndéhé yoho yàha stilé, te sǎ dúcáⁿ quide-ndo-án te cucuéchi xii-ndo chi ñǎ túú nèhe-ndo sǎ yíñùhu sǎ cúú-xí yiqui cuñú Xítóhó Jesucristú, te ni ñà túú nèhe-ndo sǎ yíñùhu sǎ cúú-xí níñi-gǎ.

²⁸ Te ío váha cada cuendá-ndó te núu ndècu váha iní-ndó núú Xítóhó Jesucristú òré cúmǎní-gǎ caxi-ndo pàá ndihi òré cúmǎní-gǎ coho-ndo ndùdí ndéhé yoho yàha stilé. Te núu ndècu váha iní-ndó núú-gǎ te caxi-ndo te coho-ndo.

²⁹ Te dava nchòhó ñǎ túú sàni váha iní-ndó cuendá yiqui cuñú Xítóhó Jesucristú te xèxi-ndo paá te xìhi-ndo ndudí ndéhé yoho yàha stilé, te nacháhu-ndo sǎ dúcáⁿ ñà túú sàni váha iní-ndó.

30 Te diu sá dúcáⁿ quide-ndo núu xíáⁿ vâi-ndo cuhú, te ío ndàhú ndécú-ndó, te dava ñáyiu ndècu ndihí-ndo sa ní xíhí-yu.

31 Dico núu ío váha sáha-o cuendá nàcuáa ndècu-o núu Yá Ndiöxí, te vá dúcáⁿ dândoho ñaha-gá xii-o.

32 Te òré ndéhé Yá Ndiöxí sá ñà túú quide ndáá-ó ndècu-o te dândoho ñaha-gá xii-o. Te ducaⁿ quide-gá cuendá sá vâ cuíta nihnu-o, chi núu ñáhá te cuíta nihnu-o ndihí nchaa ñáyiu ndècu ichi cuehé ichi duha.

33 Te núu xíáⁿ càháⁿ-í dóho nchaa nchòhó ñáyiu ndècu ndihí-í ichi Xítohó Jesucrístú sá òré tacá-ndó càda-ndo nacuaáa ní quide Xítohó Jesucrístú cútnàhá ní cudini-gá ndihí cue téé ní xica cuu ndihí-gá, te cundetú tnàha-ndo nduu nchaa-ndo te dâtnùní ducaⁿ càda-ndo.

34 Te núu dava-ndo xihí-ndó dòcò te caxi duuⁿ-ndo vèhe-ndo te dâtnùní nataká-ndó, cuendá òré nataká-ndó te vá cádá-ndó ìⁿ sá ñà túú tàú-ndó càda-ndo cuendá sá vâ dândoho ñaha Yá Ndiöxí xii-ndo. Te òré quixi coto ñaha-í xii-ndo te dâvâ-áⁿ cachí tnúhu-í xii-ndo nchàa dava-gá sá cúmăní.

12

Nàcuáa chîndee ñaha Espíritú Yá Ndiöxí cada-o ìⁿ ìⁿ-o

1 Te nchòhó ñáyiu ndècu ndihí-í ichi Xítohó Jesucrístú cuiní-í cachí tnúhu-í xii-ndo nàcuáa chîndee ñaha Espíritú Yá Ndiöxí xii-o ìⁿ ìⁿ-o cuendá cutnùní iní-ndó.

2 Te nchòhó sa nàha-ndo sá cÛtnàhá vátá cündècu-gá-ndó ichi Xítohó Jesucrístú ní xóo dandàhú ñáhá yùcu ñávàha xii-ndo, te ní xóo

quíndáá iní-ndó nchàa sá ñí cadúha cue ñáyiú ñuyíú-a nchaa sá càchí-yu cùu ndiòxí te ñá ndáá sá ndiòxí cúú-xí, te nchaa xiáⁿ ñá túú càháⁿ-xi.

³ Te cuíní-í sá nchòhó cutnùní iní-ndó sá Espíritú Yá Ndiòxí ñá túú chìndee-xi ni #ⁿ ñáyiú cuèndá sá càháⁿ úhú-yu Xítóhó Jesucrístú. Te ni #ⁿ ñáyiú ñá túú càhu iní-yu cáháⁿ-yu sá Xítóhó Jesucrístú cúú-gá Xítóhó-yu te núu ñá túú Espíritú Yá Ndiòxí dácàhu iní ñáhá-xí xí-yu.

⁴ Te ndi dǐⁿ ndi dǐⁿ ndùu chiuⁿ ní cachí Espíritú Yá Ndiòxí cada-o, te diu-ni #ⁿdì-ni Espíritú-gá ndécú.

⁵ Te ndi dǐⁿ ndùu chiuⁿ quide-o xinu cuechi-o núu #ⁿdì-ni Xítóhó Jesucrístú.

⁶ Te ndi dǐⁿ ndi dǐⁿ chìndee ñaha Yá Ndiòxí xii-o nàcuáa cada-o chiúⁿ-gá, te diu-ni #ⁿ dì-gá ndécú chìndee-gá nchaa ñáyiú.

⁷ Te Espíritú Yá Ndiòxí quidé-xí sá nchóó càda-o sá vâha, te ducaⁿ chìndee-o cue ñáyiú ndècu ndihi-o ichi Xítóhó Jesucrístú.

⁸ Te dava-o ñí nduu táhú-ó nǔú Yá Ndiòxí sá Espíritú-gá cada te ndacu-o cǎháⁿ-ó tnǔhu sá ïo càhnu cuu diu-ni tnúhu mee Yá Ndiòxí, te dava tucu-o ñí nduu táhú-ó cùtnuní iní-ó nàcuáa càháⁿ tnúhu-gá te cáháⁿ-ó nàcuáa cuíní Espíritú-gá.

⁹ Te dava tucu-o ñí nduu táhú-ó sá ïo quíndáá iní-ó Xítóhó Jesucrístú cuèndá cada-gá #ⁿ sá cuíní-ó, te ducaⁿ chi Espíritú Yá Ndiòxí chíndèe ñaha-xi xii-o. Te dava tucu-o ñí nduu táhú-ó sá càcáⁿ táhú-ní-ó nǔú Xítóhó Jesucrístú cuèndá ñáyiú cùhú te ndúha-yu.

¹⁰ Te dava tucu-o ñí nduu táhú-ó sá ndácú-ó càda-o nchaa sá vǎ yǒo tnàhí ndàcu cada, te dava

tucu-o ñ nduu táhú-ó nǔú Yă Ndiöxí sá cãháⁿ-ó tñũhu sá dácàhu iní ñáhá-gă xii-o, te dava tucu-o ñ nduu táhú-ó sã cútnùní iní-ó nǔu ðiu Espíritú Yă Ndiöxí chíndèe ñaha-xi xii ñáyiú òré cãháⁿ-yu tñúhu-gá àdi cue espíritú cúndìhi yucu ñávãha. Te dava tucu-o ñ nduu táhú-ó cãháⁿ-ó tñũhu sá dácàhu iní ñáhá Espíritú Yă Ndiöxí xii-o tñũhu sá ñã túú xìní-ó, te dava tucu-o ñ nduu táhú-ó cãháⁿ-ó nàcuáa quèe-xi nchaa tñúhu-áⁿ.

11 Te ìⁿdi díí-ni Espíritú Yă Ndiöxí ducaⁿ chíndee ñaha-xi, te ðiu-ni Espíritú-gá dácãhñu ñaha-xi xì-o ndi dííⁿ nǔú chùⁿ sá cuìní méé-xí càda-o.

Nchaa-o ìⁿ-ni cuu-o ndihi Xítóhó Jesucristú

12 Te nchoo ñáyiú ndècu ñuyíú-a titní xichi cùu yiquí cuñú-ó dico ìⁿ-ni cùu-xi, te ðiu-ni ducaⁿ sãtnahá-xi cùu-o vitna ndecu-o ichi Xítóhó Jesucristú chi ìⁿ-ni cùu-o ndihi-gá.

13 Te dava-o cùu-o ñáyiú isràél, te dava-o ñã túú cùu-o ñáyiú isràél, te dava-o cùu-o ñáyiú ñã túú tñàhí dàñá quee núú chíúⁿ pàtróóⁿ-xi, te dava-o cùu-o ñáyiú dàñá quèé nǔú chíúⁿ pàtróóⁿ-xi. Te mee Espíritú Yă Ndiöxí ní quide-xi sá ncháá-ó ìⁿ-ná cúú-ó ndècu-o ndihi Xítóhó Jesucristú. Te Yă Ndiöxí ní cachí-gá sá ncháá-ó cùndecu ndihi-o Espíritú-gá.

14 Te nchòhó xìní-ndó sã tìtní xichi cùu yiquí cuñú-ó te ñã díú ìⁿ-ni xichi cuu-xi.

15 Te cuèi sáhá-ó ndihi ndaha-o ñã túú ìⁿ-ni cuu-xi dico vá cúú càchí-ó sã sáhá-ó ñã túú cùu-xi yiquí cuñú-ó.

16 Te cuèi lóho-o ndihi tinuu-o ñã túú ìⁿ-ni cuu-xi dico vá càchí-ó sã lòho-o ñã túú cùu-xi yiquí cuñú-ó.

17 Te núu nihíí ní ndúú yìqui cuñú-ó ní xĩndéé mee-ni tĩnuu-o, te ñá túú ndèé cundeé lóho-o cùndedóho ni cùu te núu ducaⁿ, àdi núu nihíí yìqui cuñú-ó ní xĩndéé mee-ni lõho-o te ñá túú ndèé cundeé dítní-ó ní cùu te núu ducaⁿ.

18 Dico mee Yá Ndiõxí ní taxi ndecu-gá ìⁿ ìⁿ xichi yìqui cuñú-ó nàcuáa ní cachí iní méé-gã.

19 Te núu ìⁿ-ni sã ní xĩndecu nihíí yìqui cuñú-ó, te vá cùndùu-xi nacuáa tàú-xi cunduu ni cùu te núu ducaⁿ.

20 Dico tĩtní xichi cùu yìqui cuñú-ó, te ìⁿ-ni cùu-xi nihíí-xi.

21 Te sa nàha-o sá vã cúú càchí-ó sã tĩnuu-o ñá túú xìni ñuhu-xi ndaha-o, àdi díquí-ó ñà túú xìni ñuhu-xi sáhá-ó.

22 Te nchoo sà naha-o sá dává xìchi yìqui cuñú-ó sã càchí-ó sã ñà túú cùnuu ío-gá xíní ñuhu-xi.

23 Te dava xichi yìqui cuñú-ó sã ñà túú quide cuendá cávihí-ó nchàa xíãⁿ sá quidáhu dóó sácũhnu-o, te dava xichi yìqui cuñú-ó ñà cúú cùtúu chi dacuítíí sã quidáhu.

24 Te nchaa xichi yìqui cuñú-ó sã cúú cùtúu ñá túú xìni ñuhu-xi quidáhu. Te Yá Ndiõxí ní taxi ndecu-gá nchaa xichi yìqui cuñú-ó nàcuáa tàú-xi cunduu. Te ní cachí-gá sá dává-gã xichi yìqui cuñú-ó nũú vã cúú cùtúu quidáhu.

25 Te ducaⁿ ñí quide-gá cuendá sá ìⁿ-ní cùu yìqui cuñú-ó. Te ducaⁿ ndì tnahá ìⁿ ìⁿ xichi yìqui cuñú-ó chĩndee tnahá-xi. Te ducaⁿ sãtnahá-xi cùu nchoo vitna ndecu-o ichi Xítóhó Jesucristú chi chĩndee tnahá-o.

26 Te núu ìⁿ xichi yìqui cuñú-ó ná tnahúhú te nihíí-ó quide úhú-xi, te núu ìⁿ xichi yìqui cuñú-ó

ïo váha ndècu-xi te ducaⁿ ñihí yiqui cùñú-ó cúú vǎha-xi. Te ducaⁿ sǎtnahá-xi cùu-o vitna ndecu-o ichi Xítóhó Jesucrístú.

27 Te nchoo ndècu ndihi-o Xítóhó Jesucrístú, te cùu-o datná yiqui cùñú-gá te ìⁿ ìⁿ-o cùu-o datná ìⁿ ìⁿ xichi yiqui cùñú-gá.

28 Te ducaⁿ sǎtnahá-xi cùu-o chi Yá Ndiöxí ní taxi-gá ndí dííⁿ ndí dííⁿ chiuⁿ quide-o sá cúú-xí nchàa ñáyiú ndècu ichi-gá. Te díhna-gá cue téé caca cuu cáháⁿ tnúhu-gá núú ñáyiú ní taxi ndecu-gá, te dǎtnùní ní taxi ndecu-gá cue téé cáháⁿ tnúhu-gá nàcuáa dàcahu iní ñáhá mèe-gá, te dǎtnùní ní taxi ndecu-gá cue téé dǎnehé ñáhá xii ñáyiú tnúhu-gá núú tàcá-yu, te dǎtnùní ní taxi ndecu tucu-gá cue téé ndàcu quide sá vǎ yǒo tnàhí ndàcu cada. Te ní taxi ndecu tucu-gá cue téé xicáⁿ táhú-ní núú Xítóhó Jesucrístú cuèndá ñáyiú cùhú te ndúha-yu. Te ní taxi ndecu tucu-gá cue téé chindee cue ñáyiú ndècu ichi-gá. Te ní taxi ndecu tucu-gá cue téé yìndaha ñaha xii ñáyiú ndècu ichi-gá, te ní taxi ndecu tucu-gá cue téé càháⁿ tnúhu sá dácàhu iní ñáhá Espíritú-gá tnúhu sá ñà túú xìní-güedé.

29 Te ñá ncháá-ó cùu-o cue téé ní táúchíúⁿ Xítóhó Jesucrístú cáháⁿ tnúhu-gá núú ñáyiú, te ñá ncháá-ó cùu-o cue téé càháⁿ tnúhu sá dácàhu iní ñáhá Yǎ Ndiöxí xii-o. Te ñá ncháá-ó cùu-o cue téé dácuaaha ñaha xii-yu. Te ñá ncháá-ó cùu-o cue téé quide sá vǎ yǒo tnàhí ndàcu cada.

30 Te ñá ncháá-ó cùu-o cue téé dìcò-ni cácáⁿ táhú núú Xítóhó Jesucrístú cuèndá ñáyiú cùhú te ndúha-yu. Te ñá ncháá-ó cùu-o cue téé càháⁿ tnúhu sá dácàhu iní ñaha Espíritú Yǎ Ndiöxí tnúhu sá ñà túú xìní-ó, te ñá ncháá-ó cùu-o cue téé cùtnuní

iní-xi cáháⁿ nàcuáa ndùu tnúhu-áⁿ.

³¹ Te ío nducu ndèe-ndo cada-ndo nacuáa nduu táhú-ndó núú Yă Ndiöxí nchaa sá ío-gá cúnùu cada-ndo. Te vitna na dānehé ñáhá tùcu-í xii-ndo nàcuáa cada-ndo, dico sá dānehé ñáhā-í-a ío-gá cúnùu-xi.

13

Cuu iní-ó tnàha ñáyiu-o

¹ Te núu nchoo xìní-ó cǎháⁿ-ó tnũhu sá ío vii ío váha cuáháⁿ cǎháⁿ ñáyiu ñuyíú-a, àdi xìní-ó cǎháⁿ-ó tnũhu sá ío vii ío váha cuáháⁿ cǎháⁿ cue espíritú xínú cuèchi núú Yă Ndiöxí, te núu xìní-ó cǎháⁿ-ó nchàa tnúhu-áⁿ te ñá túú cùu iní-ó cuè tnaha ñáyiu-o ña, te ñá túú nāndíhi-xi sá xìní-ó cǎháⁿ-ó tnũhu-áⁿ te cùu-o datná dava caá sá ío dusaⁿ quide.

² Te núu cùu-o ñáyiu cǎháⁿ tnúhu sá dácàhu iní ñáhá Yă Ndiöxí, àdi cuu-o ñáyiu cùtnuní iní-xi nàcuáa cuáháⁿ nchaa tnúhu ndùu yuhu ni cuu, àdi cuu-o ñáyiu ío váha cùtnuní iní-xi nchaa nàcuáa quide Yă Ndiöxí, àdi cuu-o ñáyiu ío váha sàndáá iní ñáhá xii Yă Ndiöxí nàcuáa ndacu-o cùu-o ñⁿ yucu xocuñí-xi núú ndécú-xí, te núu nchaa xíáⁿ xìní-ó càda-o te ñá túú cùu iní-ó cuè tnaha ñáyiu-o ña, te ñá túú vèdana nāndíhi-xi te núu vá cúú iní-ó tnàha ñáyiu-o cuèi na càda-o nchaa xíáⁿ.

³ Te cuèi nchaa sá ndécú ndíhi-o na dacáhñu-o, te cuèi na cuàha cuendá-ó mèe-o cáyú-ó sá cúú-xí Yă Ndiöxí, dico ñá túú vèdana chĩndee ñaha-xi xii-o sá dúcáⁿ càda-o te núu ñá túú cùu iní-ó cuè tnaha ñáyiu-o.

⁴ Dico núu cùu iní-ó cuè tnaha ñáyiu-o, te cànnu iní-ó, te quide váha-o, te ñá túú cùu-o ñáyiu cuédú

íní, te ni ñà túú càháⁿ-ó nũu cùu cahnu-o, te ni ñà túú sàni iní-ó càda cahnu-o mee-o,

⁵ te ni ñà túú ñùhu cuehé iní-ó, te ni ñà túú ndùcu-o mee-ni sá cúú-xí mèe-o, te ni ñà túú-gã cùdǎéⁿ-ó cuèndá ñⁿ sá cúú, te ni ñà túú-gã sácũhuⁿ iní-ó sã quidé ñàha tnaha ñáyiu-o xì-o.

⁶ Te ni ñà túú-gã cùdǎí iní-ó nchàa sá ñà túú vǎha quide ñáyiu, chi mee-nǎ cuèndá nchaa sá vǎha cùdǎí iní-ó.

⁷ Te nchaa sá yǎha-o sàcahnu iní-ó, te sàni váha iní-ó cuèndá nchaa ñáyiu, te sàni iní-ó sã díú-ní nchàa sá vǎha cuu xii nchaa tnaha ñáyiu-o ndéé cuèé-gá, te ío quide cahnu iní-ó cuèi nándi sá yǎha-o, te nchaa xíáⁿ quidé-ó te núu cùu iní-ó cuè tnaha ñáyiu-o.

⁸ Te ni caa ni quíhíⁿ duha-ni cuu iní-ó cuè tnaha ñáyiu-o. Dico sáá nduu te vá cóo-gǎ ñáyiu cáháⁿ tnúhu sá dácàhu iní ñáhá Yǎ Ndiǒxí, te ni vǎ cóo-gǎ ñáyiu cáháⁿ tnúhu sá dácàhu iní ñáhá Espíritú Yǎ Ndiǒxí tnúhu sá ñà túú xini-yu, te ni vǎ cóo-gǎ ñáyiu túha dàtná túha ñáyiu vitna.

⁹ Te vitna ñá túú cùtnuní iní-ó nchàa nacuáa sàni iní Yǎ Ndiǒxí chi sacú-ni cùtnuní iní-ó, te ducaⁿ sàcú-ni càháⁿ-ó nàcuáa ndùu tnúhu-gá, dico càháⁿ-ó tnúhu-gá nàcuáa dàcahu iní ñáhá-gǎ xii-o.

¹⁰ Te na sàá nduu càda Yá Ndiǒxí nchaa nàcuáa tàú-xi cunduu, te dàvá-áⁿ te nchaa sá cǎchí-gá ñà túú ndècu-xi nacuáa tàú-xi cunduu vá dúcáⁿ-gǎ cundecu-xi.

¹¹ Te yúhú cútnàhá ní cuu landú-í ní xóo cada-í sá cùu-í landú, ní xóo cáháⁿ-í, ní xóo cani iní-í, te ní xóo tecú tnùn-í dàtná quidé cuè landú xĩndecu vitna, dico sátá ñí cuu-í ñⁿ tée cùu sacuéhé te ñá

túú-gă quidè-í dàtná ní xóo cada-í cútnàhá ní cuu landú-í.

¹² Te ducaⁿ sàtnahá-xi cùu-o vitna ndecu-o ichi Xítóhó Jesucristú, chi ñá túú cùtnuní váha iní-ó nàcuáa cùu cuendá Yă Ndiǒxí, te cùu-o datná ñáyiu ndèhe ìⁿ núú yùtátá sǎ ñà túú tǔu váha núú-xi, te ducaⁿ sàtnahá-xi cùu-o chi ñá túú cùtnuní váha iní-ó nǎsa cùu cuendá-gá, dico sǎá nduu quíní núú-ó-gá. Te nchoo sàcú-ni cùtnuní iní-ó nàcuáa ndùu-gá vitna dico na sǎá nduu te quíní ndáá-ó nàcuáa càa nacuáa ndùu-gá dàtná xìní ñáhá mèe-gá xii-o.

¹³ Te ni caa ni quíhíⁿ ducaⁿ-ni quèndáá iní-ó Yă Ndiǒxí, te ducaⁿ-ni cùndecu ndihí-o tnúhu ndee ìní cundecu-o ndihí-gá, te ducaⁿ-ni ìo cuu iní-ó-gǎ ndihí tnàha ñáyiu-o. Te sá cúú ìní-ó Yă Ndiǒxí ndihí sá cúú ìní-ó tnàha ñáyiu-o xǎⁿ ío-gá cúnùu-xi dacúúxí dǎva-gá.

14

Ñáyiu càháⁿ tnúhu sá dácàhu iní ñáhá Espíritú Yă Ndiǒxí

¹ Te vá dáñá ndèé-ndó cùu iní-ndó tnàha ñáyiu-ndo, te cuhuⁿ iní-ndó sǎ ndùu tǎhú-ndó nǔú Yă Ndiǒxí titní núú chiuⁿ cada-ndo nacuáa chindee ñàha Espíritú-gá xii-ndo, te ío cuhuⁿ iní-ndó sǎ ndúú tǎhú-ndó càháⁿ-ndó tnúhu sá dácàhu iní ñáhá Yă Ndiǒxí xii-ndo.

² Te cue ñáyiu càháⁿ tnúhu sá dácàhu iní ñáhá Espíritú Yă Ndiǒxí tnúhu sá ñà túú xìní-yu, te tnúhu càháⁿ-yu-áⁿ cúú-xí sǎ cúú-xí Yă Ndiǒxí te ñá díú sǎ cúú-xí ñáyiu chi ñá túú tècú tnùní-yu, te mee

Espiritú Yă Ndiöxí quidé-xí dùcaⁿ caháⁿ-yu tnúhu yìyuhu.

³ Te cue ñáyiú ní nduu táhú nǔú Yă Ndiöxí cáhánⁿ tnúhu sá dácàhu iní ñáhá-gă xií-yu, te ñáyiú-ánⁿ dácàháⁿ-yu ñáyiú nàcuáa cuita níhí ndéé-gă-yu cundecú-yu ichi-gá, te ducaⁿ cuăñhàhá-yu tnúhu ndee iní xií-yu òré ndìhú iní-yu.

⁴ Te ñáyiú càháⁿ tnúhu sá dácàhu iní ñáhá Espiritú Yă Ndiöxí xií-yu tnúhu sá ñà túú xìní-yu-ánⁿ, ñáyiú-ánⁿ mee-ní-yu nìhí ndéě-yu ndècú-yu ichi-gá. Dico ñáyiú càháⁿ tnúhu sá dácàhu iní ñáhá-gă xií-yu, càháⁿ-yu tnúhu-ánⁿ nàcuáa níhí ndéé dàva-gá ñáyiú nchìcúⁿ nihnu ichi-gá.

⁵ Te yúhú ío cudíí iní-í te núu nchaa-ndo càháⁿ-ndó tnúhu sá dácàhu iní ñáhá Espiritú Yă Ndiöxí xii-ndo tnúhu sá ñà túú xìní-ndó. Dico ío-gá cudíí iní-í te núu nchaa-ndo càháⁿ-ndó tnúhu sá dácàhu iní ñáhá-gă, chi ío-gá xíní ñùhu-xi sá càháⁿ-ndó tnúhu-ánⁿ dácúúxí sǎ càháⁿ-ndó tnúhu sá dácàhu iní ñáhá Espiritú-gá càháⁿ-ndó tnúhu sá ñà túú xìní-ndó. Dico ìⁿ-ni nǔtnahá-xi quide-ndo te núu nchòhó ñáyiú càháⁿ tnúhu sá dácàhu iní ñáhá Espiritú-gá càháⁿ-ndó nàcuáa quèe-xi tnúhu-ánⁿ. Te ducaⁿ te nchaa ñáyiú ndècu ichi Yă Ndiöxí cuita níhí ndéé-gă-yu quíhíⁿ cundecú-yu ichi-gá.

⁶ Te núu yúhú quexìo-í núú ndècú nchòhó ñáyiú ndècu ndìhí-í ichi Xítóhó Jesucrìstú, te ngüíta-í càháⁿ-í mee-ni tnúhu sá dácàhu iní ñáhá Espiritú Yă Ndiöxí xii-í tnúhu sá ñà túú xìní-í, te ñà túú nǎ sá vǎha cuu-xi sá cúú-xí-ndó. Dico cuu-xi sá vǎha xii-ndo te núu na càháⁿ-í núú-ndó nchàa tnúhu sá dǎnehé ñáhá Yă Ndiöxí xii-í tnúhu sá vǎta dácùàha-gá-í, ndìhí nchaa tnúhu sá sà xìní-í, ndìhí

nchaa tnúhu sá dácàhu iní ñáhá-gã xii-í cáhán-í, ndihí nchaa dava-gá tnúhu-gá.

⁷ Te na càda-o cuendá sá nũu ìíⁿ tée tìú-dé v̄lu àdi cani-dé àrpá te núu ñá túú sàhnú-dé ndihí-xi ìíⁿ yaá, te ñá cútnùní iní-ó nã yaá cání-dě àdi ná yaá tìú-dé te núu ducaⁿ na càda-dé.

⁸ Te ñiu-ni ducaⁿ sãtnahá-xi cùu tucu tée cùu sandadú tìú cútú, chi núu vá tìú váha-dé nàcuáa tàú-xi cunduu òré quíhíⁿ-güedé nàa-güedé, te vá ngũndecu túha dava-gá cue sandadú te núu ducaⁿ na càda-dé vá tìú váha-dé.

⁹ Te ducaⁿ sãtnahá-xi cùu nchohó te núu vá cáhán-ndó ìíⁿ tnúhu nàcuáa tàú-xi cunduu núu ñáyiú te vá tècú tnùní-yu tnúhu cáhán-ndó. ¡Chi àúⁿ nã cuu cáhán-ndó te núu ducaⁿ na càda-ndo!

¹⁰ Te ío títíⁿ núu tnũhu ío ñuyíú, te ìíⁿ ìíⁿ núu tnũhu-án cútnùní iní ñáyiú nàcuáa quèe-xi.

¹¹ Te núu nchoo ñã tècú tnùní-ó ìíⁿ tnúhu cáhán ìíⁿ ñáyiú, te quide-ó-yu ñáyiú ñuú xícá chi ñá túú cáhán-yu tnúhu cáhán-ó, te ñiu-ni ducaⁿ quide ñahá-yu xii nchoo tucu.

¹² Te xíáⁿ nũu càchí tnúhu-í xii nchaa nchòhó ñáyiú ío cuíní nduu táhú nũú Yã Ndiõxí sá Espíritú-gá chindee ñaha-xi xii-ndo cada-ndo ná daha núú chiúⁿ, te ío nducu ndèe-ndo cada-ndo chiúⁿ sá ñi nduu táhú-ndó nàcuáa cuita níhí ndéé-gã ñáyiú ndecu ichi-gá quíhíⁿ.

¹³ Te núu cáhán-ndó tnũhu sá ñà túú xìní-ndó, tnúhu sá dácàhu iní ñáhá Espíritú Yã Ndiõxí xii-ndo, te xìni ñuhu-xi sá càcáⁿ táhú-ndó nũú Yã Ndiõxí cuendá sá ná chindee ñaha-gá xii-ndo cáhán-ndó nũú ñáyiú núu nása quèe-xi tnúhu-án.

¹⁴ Chi núu nchoo na cáhán ndihí-o Yã Ndiõxí

ndihì tnúhu sá ñà túú xìní-ó, te ni yùhu ni iní-ó cãháⁿ ndihì-o-gã dícó-ni sá ñã tècú tnùnì-ó nàcuáa ndùu tnúhu cãháⁿ-ó.

¹⁵ Te xíáⁿ nũu xìnì ñuhu-xi cãháⁿ ndihì-o Yã Ndiõxí ni yùhu ni iní-ó nàcuáa chìndee ñaha Espíritú-gá xii-o te cãháⁿ-ó nàcuáa tecú tnùnì-ó, te ñu-ni ducaⁿ càda-o oré xítá yùhu-o chiñuhu-o Yá Ndiõxí, chi ni yùhu ni iní-ó dùcaⁿ cada-o nacuáa chìndee ñaha Espíritú-gá xii-o, te cùtnuní iní-ó nàcuáa cuáháⁿ nchaa tnúhu cãháⁿ-ó xíta-o.

¹⁶ Chi núu nchoo na ndàcáⁿ táhú-ó nũú Yã Ndiõxí ndihì mee-ni tnúhu sá ñà túú xìní-ó tnúhu sá dácàhu iní ñáhá Espíritú-gá xii-o, te ñáyiu ñà túú ní ndùu táhú cãháⁿ tnúhu cãháⁿ-ó ndedóho ñáhá-yu xii-o, te ñáyiu-áⁿ vã ndácũ-yu cãháⁿ-yu tnúhu cãháⁿ-ó ndàcáⁿ táhú-ó ndihí-yu núú Yã Ndiõxí chi ñà túú tècú tnùnì-yu tnúhu cãháⁿ-ó.

¹⁷ Te váha-ni quide-o sá dúcáⁿ cãháⁿ-ó ndàcáⁿ táhú-ó nũú Yã Ndiõxí, te dícó-ni sá tnũhu-áⁿ ñà túú chìndee-xi ñáyiu nàcuáa cuita níhí ndéé-gã-yu cundecú-yu ichi-gá.

¹⁸ Te yúhú ío ndàcáⁿ táhú-í núú Yã Ndiõxí chi cãháⁿ-í tnúhu sá ñà túú xìní-í tnúhu sá dácàhu iní ñáhá Espíritú-gá xii-í, te cãháⁿ-gá-í dácúxí nchaa nchohó.

¹⁹ Te òré tàcá ñáyiu ndècu ichi Yá Ndiõxí dácuahá-yu tnúhu-gá, te cãháⁿ-í tnúhu-gá núũ-yu sá sà ní cutnùnì iní mée-í nàcuáa ducaⁿ cùtnuní iní-yu nàcuáa ndùu tnúhu cãháⁿ-í. Te tnáhá-gá iní-í cãháⁿ-í úhúⁿ-ni tnúhu-áⁿ nũũ-yu dácúxí sã cãháⁿ-í úxí mĩ tnúhu sá ñà túú xìní-í, tnúhu sá dácàhu iní ñáhá Espíritú Yã Ndiõxí xii-í cãháⁿ-í.

²⁰ Te nchòhó ñáyiu ndècu ndihì-í ichi Xítohó Jesucrìstú, vá cánì ìní-ndó dàtná sání ìní cue

landú, chi cani iní-ndó dàtná tàú-xi cunduu chi sa sacuéhé-ndó. Dico cuu-ndo dàtná cue landú lihli vá cùndècu-ndo ichi cuehé ichi duha, chi cue landú-án ñà túú ndècu-güexi ichi-án.

²¹ Te núú tütú Yă Ndiöxí cáhán-xi nàcuáa ní cáhán-gá, te cächí-xi: “Cue téé ñúú xícá cáhán ndi dííⁿ núú tnũhu quíhíⁿ-güedé cáhán-güedé tnúhu-í núú ñáyiu israhél cada-güedé núú-í, te cuèi ducaⁿ dico vá quíndáá iní-yu tnúhu-í”, duha ní cachí Yă Ndiöxí te ducaⁿ ñí ngúndeé núú tütú-gá.

²² Te tnúhu sá dácàhu iní ñáhá Espíritú Yă Ndiöxí xii-o tnũhu sá ñà túú xìní-ó, xíáⁿ cúú-xí cuendá sá cútnùní iní cue ñáyiu ñá túú sàndáá iní tnúhu Yă Ndiöxí sá ñà túú cùu váha iní ñáhá-gă xii-yu. Dico sá cúú-xí cuè ñáyiu sàndáá iní tnúhu-gá ñá túú ñá quidé-xí sá cúú-xí-yu. Te tnúhu sá dácàhu iní ñáhá Yă Ndiöxí xii-o, xíáⁿ cúú-xí cuendá sá cútnùní iní cue ñáyiu sàndáá iní tnúhu-gá sá ndécú ndíhi ñaha-gá xii-yu, dico ñá túú dùcaⁿ sani iní cue ñáyiu ñá túú sàndáá iní tnúhu-gá.

²³ Te núu ní tacá nchaa nchòhó ñáyiu ndècu ichi Yă Ndiöxí, te nchaa-ndo ñí ngüíta-ndo cáhán-ndó tnũhu sá dácàhu iní ñáhá Espíritú Yă Ndiöxí xii-ndo tnũhu sá ñà túú xìní-ndó, te mei òré-án quexìo cue ñáyiu ñá túú sàndáá iní tnúhu-gá, ndíhi cue ñáyiu vátá quíní dana-gá tnúhu-gá núú ndécú-ndó, te ñáyiu-án quesàhá-yu sá lùcú-ndó te núu ducaⁿ cáhán-ndó tnũhu sá dácàhu iní ñáhá Espíritú-gá xii-ndo òré quexìó-yu.

²⁴ Dico núu nchaa-ndo cáhán-ndó tnũhu sá dácàhu iní ñáhá Yă Ndiöxí xii-ndo, te mei òré-án quexìo cue ñáyiu ducaⁿ ñà túú sàndáá iní-xi tnúhu-gá, ndíhi cue ñáyiu ducaⁿ ñà túú xìní dana

tnúhu-gá-án, te ñáyi-án cutnùnì iní-yu sá ndécú cuěchi-yu núú-gã, te ngüíta-yu cuáha-yu cuendá sá ñà túú quide váha-yu ndécú-yu cuendá sá cãháⁿ-ndó tnúhu-gá ndedóho-yu.

²⁵ Te nchaa sá cuèhé sá dúhá ñi quidé-yu sàni iní-yu yìyuhu ndacu iní-yu, te ngüíta-yu náhmá-yu nchaa sá ñà túú váha ní quidé-yu núú Yã Ndiöxí, te cachí-yu sá ïo cãhnu cuu-gá, te cachí tucú-yu sá ndàá ndécú ndìhi-ndo-gá.

Cada-o nàcuáa tàú-xi cunduu

²⁶ Te vitna nchòhó ñáyi ndècu ndìhi-í ichi Xítóhó Jesucrístú xini ñuhu-xi duha cada-ndo. Òré tàcá-ndó te dava-ndo càta yuhu-ndo chiñuhu-ndo Yã Ndiöxí, te dava-ndo dàsahú-ndó ñáyi tnúhu-gá, te dava-ndo cãháⁿ-ndó nàcuáa dàquixi túu Yã Ndiöxí iní-ndó, te dava-ndo cãháⁿ-ndó tnúhu sá dácàhu iní ñáhá Espíritú Yã Ndiöxí xii-ndo tnúhu sá ñà túú xini-ndó, te dava-ndo cãháⁿ-ndó nàcuáa quèe-xi tnúhu-án. Te nchaa sá quidé-ndó ná cùu-xi nacuáa chindee-xi ñáyi nàcuáa cuita níhi ndéé-gã-yu cundecú-yu ichi-gá.

²⁷ Te òré cãháⁿ-ndó tnúhu sá dácàhu iní ñáhá Espíritú Yã Ndiöxí xii-ndo tnúhu sá ñà túú xini-ndó, te úú-ni-ndo àdi úní-ñi tnáhá-ndó cãháⁿ-ndó tnúhu-án te vá úúⁿí cãháⁿ-ndó chi ndéé ndìhi ñⁿ-ndo te dàtnùnì ngüíta ingá-ndó cãháⁿ-ndó. Te xini ñuhu-xi sá ñⁿ ñáyi cãháⁿ-yu nàcuáa quèe-xi tnúhu cãháⁿ-ndó-ãⁿ.

²⁸ Te núu ñá túú ñáyi tècú tnùnì nàcuáa quèe-xi tnúhu cãháⁿ-ndó-ãⁿ, te núú méé núú ñⁿ-ní-ndó cãháⁿ-ndó tnúhu-án cãháⁿ ndìhi-ndo Yã Ndiöxí te vá cãháⁿ-ndó núú ñáyi.

29 Te òré càháⁿ-ndó tnũhu sá dácàhu iní ñáhá Yă Ndiõxí xii-ndo te úú-ni-ndo àdi úní-ni tucu-ndo càháⁿ, te dava-gá-ndó cùndedóho-ndo tnũhu-áⁿ te càháⁿ-ndó nũu váha-ni càháⁿ-güedé àdi ñá túú váha-ni.

30 Te núu ìⁿ-ndo ñí dácáhú ìní ñáhá Yă Ndiõxí xii-ndo ìⁿ tnúhu càháⁿ-ndó, te núu ìⁿ-ndo sà caháⁿ-ndó te ngüíñí-ndó te quíhu tucu ingá-ndó càháⁿ-ndó nàcuáa ní dácáhú ìní ñáhá Yă Ndiõxí xii-ndo.

31 Te nchaa nchòhó ñáyiu ní nduu táhú càháⁿ tnúhu sá dácàhu iní ñáhá Yă Ndiõxí, te vá úú-ní càháⁿ-ndó chi díhna-gá ìⁿ-ndo càháⁿ te dătnùní càháⁿ tucu ingá-ndó. Te ducaⁿ càda-ndo cuendá nchaa-ndo tècú tnùnì-ndó nàcuáa ndũu tnúhu càháⁿ ìⁿ ìⁿ-ndo, te ducaⁿ te cudíí-gă ìní-ndó cànchicúⁿ nihnu-ndo ìchi-gá.

32 Te nchaa ñáyiu càháⁿ tnúhu Yá Ndiõxí sa nàha-ná mée-yu nàcuáa quidé-yu càháⁿ-yu tnúhu-gá nàcuáa ñá túú quide cutexínu-yu.

33 Te Yá Ndiõxí cúu-gă Yaá quidé ïo váha cùu ìⁿnuu-ndo ndecu-ndo, te ñá túú daticá nuu ñaha-gă xii-ndo.

Te na càhí tnúhu-í xii-ndo nàcuáa càháⁿ-í nchaa núú tàcá cue ñáyiu ndècu ndíhi-o ichi Xítóhó Jesu-crístú.

34 Te yúhú càhí-í sá vă cúú càháⁿ cue ñáyiu dìhí òré tàcá-ndó dàcuaha-ndo tnúhu-gá, chi ñá túú dùcaⁿ cuiní-gá cadá-yu, te quíndáá-ni ìní-yu cadá-yu nàcuáa tàú-xi cunduu.

35 Te núu ìⁿ sá cuiní-yu nducu tnũhu-yu te ndée òré nasáá-yu vehé-yu te nducu tnũhu-yu núú yíí-yu, chi ñá túú ndũu váha-xi sá càháⁿ-yu núú

tàcá nchaa ñáyiú dàcuáha ndihí-yu tnúhu-gá.

³⁶ Te chí dándàcu iní sá ñà díú nchòhó cúú-ndó ñáyiú ní ngúndecu ndihí tnúhu Yá Ndiòxí díhna nuu nàcuáa datècú tnúhu-ndo dâva-gá ñáyiú, te ni ñà díú mée-ni nchohó sa ní ngúndecu ndihí-ndo tnúhu Yá Ndiòxí vitna, núu xíáⁿ vá càchí-ndó sã ïo cùnuu-ndo.

³⁷ Te núu dava nchòhó sání iní-ndó sã càháⁿ-ndó nàcuáa dàcahu iní ñáhá Yá Ndiòxí xii-ndo àdi sani iní-ndó sã quidé-ndó nàcuáa chindee ñaha Espíritú-gá xii-ndo, te cuáha váha-ndo cuèndá sá ncháá tnúhu càháⁿ-í-a cùu-xi tnúhu sá ñí cachí tnúhu mee Xítóhó Jesucrístú cada-o.

³⁸ Te nděda-ni càa ñáyiú ndècu ndihí-ndo te núu ñá túú sàndáá iní-yu tnúhu càháⁿ-í, te vá cáda cuèndá-ndó tnúhu càháⁿ-yu.

³⁹ Te vitna nchòhó ñáyiú ndècu ndihí-í ichi Xítóhó Jesucrístú, ío cani iní-ndó càháⁿ-ndó tnúhu sá dácàhu iní ñáhá Yá Ndiòxí núú ñáyiú, te dañà-ndo na càháⁿ cue ñáyiú ní nduu táhú núú Yá Ndiòxí sá càháⁿ-yu tnúhu sá dácàhu iní ñáhá Espíritú-gá xii-yu tnúhu sá ñà túú xini-yu.

⁴⁰ Te cada-ndo nchàa nacuáa tàú-xi cunduu nàcuáa ñá túú ñà cuu cundecu-ndo.

15

Ní ndoto Xítóhó Jesucrístú

¹ Te vitna nchòhó ñáyiú ndècu ndihí-í ichi Xítóhó Jesucrístú cuini-í sá dándàcu iní-ndó nàcuáa ní dánèhé ñáhà-í xii-ndo tnúhu sá càháⁿ nàcuáa naníhí tàhú-ó, chí ñiú tnúhu-áⁿ ñí sàndáá iní-ndó te nchícúⁿ nihnu-ndo.

² Te sá xii tnúhu-áⁿ níhnú-ndó ïchi cuáháⁿ-ndó núú ndúú tàhú-ndó cùndecu-ndo ndihí Yá Ndiòxí

ni caa ni quíhíⁿ, te ducaⁿ ndùu táhú-ndó núú cùndècu-ndo ni caa ni quíhíⁿ ndihí Yá Ndiöxí te núu nchìcúⁿ nihnu-ndo nàcuáa ní dánèhé ñáhà-í xii-ndo, te núu ñá túú nchìcúⁿ nihnu-ndo te ñá túú ní sàndáá iní-ndó nàcuáa tàú-xi cunduu.

³ Te yúhú sa ní cachí tnúhu-í xii-ndo ìⁿ tnúhu sá ïo cùnuu ní níhì-í, chi ní cachí tnúhu-í xii-ndo sá Xìtohó Jesucristú ní xíhí-gá cuendá nchaa yíca cuèchi-o, te ducaⁿ ñí cuu chi ducaⁿ càháⁿ-xi núú tùtú Yá Ndiöxí sá dúcáⁿ yáha-gá.

⁴ Te ní chindúxi ñaha-güedé xii-gá te nduu úní ní dándótó ñàha Yá Ndiöxí xii-gá, te ducaⁿ ñí cuu chi ducaⁿ càháⁿ-xi núú tùtú Yá Ndiöxí.

⁵ Te sátá ñí ndoto-gá te ní quee túu-gá núú tē Pèlú, te dātnùní ní quee túu-gá núú dāva-gá cue tēe ní táuchíúⁿ-gã cáháⁿ tnúhu-gá.

⁶ Te sátá dúcáⁿ te dātnùní ní quee túu-gá núú ùhúⁿ ciendú cue ñáyiú ndècu ichi-gá, te vāi-yu xīndecu-ní-yu vitna chi sacú-ni-yu ní xíhí.

⁷ Te dātnùní ní quee túu-gá núú tē Jàcobó, te sátá dúcáⁿ te dātnùní ní quee túu-gá núú nchaa cue tēe ní táuchíúⁿ-gã cáháⁿ tnúhu-gá.

⁸ Te ndéé núú ñí ndihí-ná te ní quee túu-gá núú mée-í, te òré ní quee túu-gá núu-í te cùu-í dātná ìⁿ déhe yiquiⁿ vātá sàá-gá nduu càcu chi cùu-í ìⁿ tēe ñá túú sàni váha iní-xi cuendá-gá ní cùu.

⁹ Te yúhú ñá túú cùnuu-í dātná cùnùu cue tēe ní táuchíúⁿ Xìtohó Jesucristú cáháⁿ tnúhu-gá. Te cùu-í ìⁿ tēe ní táuchíúⁿ-gã càháⁿ tnúhu-gá, cuèi ñá túú tàu-í sá càháⁿ-í tnúhu-gá, chi ní xóo cuu úhú iní-í cue ñáyiú ndècu ichi Yá Ndiöxí.

¹⁰ Dico Yá Ndiöxí ío váha iní-gá chi ní quide ñaha-gã xii-í ìⁿ tēe váha, chi ñá túú-gã quidè-í

dàtná ní xóo cada-í. Te ío cùndahú iní ñáhá-gǎ chíndèe ñaha-gá xii-í dico ñá túú àúⁿ nǎ cuu chíndee ñaha-gá, chí ío-gá vǎi chiuⁿ-gá ní cuu sa ta quíde-í cuáháⁿ dàcúxí dàva-gá cue tée ní táúchíúⁿ-gǎ cáháⁿ tnúhu-gá te ñá díú mée-í ducaⁿ quíde-í chí mee Yǎ Ndiǒxí ío cùndahú iní ñáhá-gǎ chíndèe ñaha-gá xii-í quíde-í chiuⁿ-gá.

11 Te ñá túú nǎ cada-xi cuèi dava-gá-güedé sa ní cuu vǎi-gá chiuⁿ-gá quíde-güedě àdi yúhú, chí ìⁿ-ni tnúhu càháⁿ-ndí te tnúhu-áⁿ cúú tnúhu ní sándáá iní-ndó.

Cue ñáyiú ní xíhí ndotó-yu

12 Te nchúhú cue tée càháⁿ tnúhu Xítóhó Jesucristú càháⁿ-ndí sá nǎ xíhí-gá te ní ndoto-gá, ¿te ná cuèndá dava nchòhó càchí-ndó sǎ vǎ ndótó cuè ñáyiú ní xíhí?

13 Te núu ducaⁿ sàni iní-ndó sǎ vǎ ndótó cuè ñáyiú ní xíhí te ni Xítóhó Jesucristú ñá túú ní ndòto-gá te núu ducaⁿ.

14 Te núu dìcò Xítóhó Jesucristú ñá túú ní ndòto-gá ñá, te nchaa tnúhu sá dánèhé ñáhá-ndí xii-ndo ñà túú nàndíhí-xi te núu ducaⁿ, te àúⁿ nǎ cuu sándáá iní-ndó-gǎ te núu ducaⁿ.

15 Te núu dìcò cúú-xí ìⁿ sá ndàá tnúhu sàni iní dava-ndo ña, te dàcuandehnde-ndí sá càháⁿ-ndí tnúhu Yá Ndiǒxí núú-ndó te núu ducaⁿ, te ñá túú càháⁿ ndáá-ndí núú-ndó sǎ Yá Ndiǒxí ní dándótó-gǎ Xítóhó Jesucristú, te núu ndáá nàcuáa sàni iní dava-ndo sǎ vǎ ndótó cuè ñáyiú ní xíhí, dico ñá ndàá nàcuáa sàni iní-ndó.

16 Te núu vá ndótó cuè ñáyiú ní xíhí te ni Xítóhó Jesucristú ñá túú ní ndòto-gá.

17 Te núu Xítohó Jesucrístú ñá túú ní ndòto-gá ñá, te àúⁿ nã cuu sàndáá iní-ndó-gã te núu ducaⁿ, te ndècu-ni cuèchi-ndo núú Yã Ndiòxí te núu ducaⁿ.

18 Te núu ndáá nàcuáa sàni iní-ndó ñá te cue ñáyiu ní sàndáá iní ñáhá xii Xítohó Jesucrístú ñáyiu ní xíhí ní xíta nihnú-yu te núu ducaⁿ.

19 Te núu nchoo ndècu ndihí-o tnúhu ndee iní núú Xítohó Jesucrístú cuèndá-ni sá cùndècu-o ñuyíú-a ña, te cùu-o ñáyiu ío-gá duuⁿ duuⁿ ndàhú sá cúú-xí dàva-gá ñáyiu te núu ducaⁿ.

20 Dico ndáá sá Xítohó Jesucrístú ní xíhí-gá te ní ndoto-gá núu xíãⁿ cútnùní iní dava-o sã ndótó cuè ñáyiu ní xíhí ñáyiu ní sàndáá iní tnúhu-gá.

21 Te sá cuèchi ìⁿdìi-ni téé ní xíndecu ñuyíú-a xíãⁿ xihí ñáyiu, te sá cuèndá ìⁿdìi-ni tucu ingá téé te ndoto cue ñáyiu ní xíhí.

22 Te nchaa ñáyiu xihí-yu sá cuèchi ìⁿ téé, te téé-ánⁿ cúú-dě ndíi Àdán téé díhna nuu nĩ cuu ñani tnáhá cuè ñáyiu ñuyíú. Te ñu-ni ducaⁿ sã cuèndá ìⁿdìi-ni téé te ndoto cue ñáyiu ní xíhí, te téé-ánⁿ cúú-dě Xítohó Jesucrístú chi nchaa ñáyiu ndècu ndihí-gá ndotó-yu.

23 Te díhna-gá Xítohó Jesucrístú ní ndoto-gá xíãⁿ cútnùní iní dava-o sã ndùu na quixi tucu-gá ñuyíú-a te dàvá-ánⁿ ndoto nchaa ñáyiu ní xíhí ñáyiu ní sàndáá iní tnúhu-gá.

24 Te dàtnùní ducaⁿ te sáá nduu nàa nchaa sá ío ñuyíú, te Xítohó Jesucrístú danàa-gá nchaa ndi túhú sá cùnùu ío ñuyíú-a, chi danàa-gá nchaa ñáyiu ío cùnùu, ndihí yucu ñávãha, ndihí nchaa espíritú xínú cuèchi núú-xi. Te ducaⁿ te cúñaha-gã xii Tátá-ó Dùtú Ndiòxí taxi tnùní-gá.

25 Chi Xítohó Jesucrístú dacuítíí tàxi tnuní-gá

ndéé ná sàá nduu dànaa-gá nchaa sá cúú ùhú iní ñáhá xii-gá.

26 Te ndéé núú nǐ ndihi-ná te danàa-gá sá quidé xihí ñáiyu.

27 Te ducaⁿ chi càháⁿ-xi núú tütú Yá Ndiöxí sá méé-gã ní nachihi-gá nchaa sá ió ndaha Xítóhó Jesucristú cuendá sá méé Xítóhó Jesucristú taxi tnùnigá, te vá yoo ìⁿ tàxi tnùní ñáhá xii Yá Ndiöxí, chi mee Yá Ndiöxí cúú-gã Yaá ní nachihi-gá nchaa sá ió ndaha Xítóhó Jesucristú.

28 Te díhna-gá ní xáhaⁿ Yá Ndiöxí xii Xítóhó Jesucristú Yaá cúú Dèhe-gá sá quindàha-gá nchaa sá ió, te òré ná quindaha Xítóhó Jesucristú nchaa sá ió, te cúñaha-gã xii Yá Ndiöxí taxi tnùní ñáhá-gã xii-gá, te ducaⁿ te mee-nã Yá Ndiöxí taxi tnùnigá nchaandi túhú sá ió.

29 Te núú ñá túú ndáá càháⁿ-í, ¿te ná cuendá dava ñáiyu sànduté-yu cuendá ñáiyu ní xihí nùu ñá túú ndáá sá ndótó ñáiyu ní xihí?

30 Te nchúhú ducaⁿ-ni sàni iní ñáiyu cahni ñáhá-yu xii-ndí, te núú vá ndótó ñáiyu ní xihí te àúⁿ nã cuu ducaⁿ quide cahnu iní-ndí ducaⁿ cuiní-yu cahni ñáhá-yu xii-ndí te núú ducaⁿ.

31 Te nchòhó ñáiyu ndècu ndihi-í ichi Xítóhó Jesucristú ío váha sàni iní-í cuendá-ndó, chi ndècu-o ichi-gá. Te na càchí tnúhu ndáá-í xii-ndo sã ìⁿ nduu ìⁿ nduu ndéé iní ñáhá ñáiyu cahni ñáhá-yu xii-í.

32 Te núú dìcò ndáá sá vã ndótó ñáiyu ní xihí dàtná càchí dava ñáiyu, te àúⁿ nã cuu ní xindecu-í ñuú Éfesú ní cuu úhú iní ñáhá ñáiyu xii-í te núú ducaⁿ, chi ñáiyu-áⁿ nǐ quidé-yu dàtná quidé ìⁿ quiti dééⁿ sã cúú-xii-í. Te núú ndáá sá vã ndótó ñáiyu ní

xíhí ñá, te váha-gá nõu cachí-ó dàtná càchí ñáyi: “Vitna na còho-o te na càxi-o chi tneé ìdá cuú-ó”, duha càchí-yu.

³³ Te vá dǎñá-ndó mèe-ndo dandahú ñáhá ñáyi ndècu ichi cuehé ichi duha xii-ndo, te ngüita-ndo càni iní-ndó dàtná sání iní-yu. Chi quèe ndáá-xi nàcuáa càháⁿ tucu dava-gá ñáyi, chi càchí-yu sá nõu ñáyi quide váha na ñihí tnáhǎ-yu ndihí ñáyi ndècu ichi cuehé ichi duha, te ngüita ñáyi quide váha-áⁿ cadá-yu tnàhá-yu nchaa sá cuèhé sá dúhá dàtná quidé ñáyi-áⁿ.

³⁴ Te ío váha cuáha-ndo cuendá nàcuáa cundecu-ndo, te vá cadá-gǎ-ndó dàtná quidé cuè ñáyi ndècu ichi cuehé ichi duha. Te dava-ndo quide-ndo datná quidé cuè ñáyi ndècu ichi cuehé ichi duha chi ñá túú sàndáá iní-ndó Yǎ Ndiõxí. Te duha càháⁿ-í cuendá sá cúcàháⁿ núu-ndó cuendá nchaa sá ñà túú váha quide-ndo.

Nàcuáa ndoto ñáyi ní xíhí

³⁵ Te cudana dava-ndo ndècu tnúhu-ndo nõu nása ndoto ñáyi ní xíhí, te nása cunduu yiqui cùñú-yu òré ndotó-yu.

³⁶ Te nchòhó ñáyi ducaⁿ càháⁿ cúú-ndó ñáyi ñá túú tnàhí cùnuni iní-xi, te duha na càháⁿ-í nàcuáa tecú tnùní-ndó. Te núu ñⁿ tatá ná chíhí-ó te tèhyú mée-xí te xínu déhe-xi.

³⁷ Dico ñá díú sǎ sǎ ní xínu ta sàhnu cuáháⁿ ní cǔxi-o, te díu-ni ducaⁿ quide-o cuèi triú ndihí nchaa dava-gá tatá xítú-ó.

³⁸ Te Yǎ Ndiõxí quidé-gǎ sácünduu tatá xínu-áⁿ dàtná cuíní mée-gǎ cunduu. Te ndèda-ni càa tatá te díu-ni-gá quidé-gǎ sácünduu-xi nàcuáa tàú-xi cunduu.

39 Te ndi dííⁿ ndăa nchaa yiqui cùñú, chi tucu càa yiqui cuñú nchoo cuè ñáyiu, te tucu càa yiqui cuñú nchaa quiti xica núú ñúhú, te tucu càa yiqui cuñú nchaa quiti ndàva, te tucu càa yiqui cuñú nchaa chácá.

40 Te ducaⁿ ñà túú ìíⁿ-ni caa nchaa yiqui cuñú sá ió andiu ndìhi nchaa yiqui cuñú ñáyiu ió ñuyíú-a, te ducaⁿ ñà túú ìíⁿ-ni ndáa vii nchaa sá ió andiu ndìhi ñuyíú-a.

41 Te ducaⁿ cùu tucu-xi nchíanchii chi tucu dàyehé-xi, te tucu dàyehé yóó, te tucu dàyehé nchaa chódíní, te ducaⁿ ñà túú ìíⁿ-ni dayehé nchaa chódíní.

42 Te ducaⁿ sãtnahá-xi cùu ñáyiu ní xíhí te ndoto, chi tucu càa yiqui cuñú-yu sá nguñdũxi te tucu cunduu yiqui cùñú-yu òré ndotó-yu, te yiqui cùñú sá ndótó ndìhí-yu-áⁿ vã ndìhí ñihnu-gá-xi.

43 Te yiqui cùñú ñáyiu xihí ñà túú nàndìhi-xi, dico yiqui cùñú sá ndótó ndìhí-yu te ió váha cunduu. Te nchaa yiqui cùñú ñáyiu xihí ñà túú tnàhí-gá ndee-xi, dico yiqui cùñú ndoto ndìhí-yu xíãⁿ ió cunduu ndee-xi.

44 Te yiqui cùñú nchaa ñáyiu xihí cúú-xí cuendá ñuyíú-a, dico yiqui cùñú sá ndótó ndìhí-yu xíãⁿ cundecu-ná-xi cuendá Espiritú Yã Ndiõxí. Te dàtná ió yiqui cùñú sá cúú-xí cuendá ñuyíú-a, te ducaⁿ ió yiqui cùñú sá cúú-xí cuendá mee-nã Espiritú Yã Ndiõxí.

45 Te núú tütú Yã Ndiõxí càchí-xi: “Ndíi Àdán ndíi ní xíndecu ndéé díhna ní chihí Yá Ndiõxí iní ndíi”, duha càchí-xi núú tütú-gá. Te ingá tucu tée cùu-dé dàtná ndíi Àdán te tée-áⁿ cúú-dě Xítohó Jesucrìstú,

te Yaá-án quidé-gă sá mề-ná Espiritú Yă Ndiǒxí quidé-xí ndècu-o ichi-gá vitna.

46 Te díhna-gá yìqui cùñú cuendá ñuyíú-a ní ngúndecu, te dǎtnùní ngúndecu yìqui cùñú cundecu ndìhi mee-nă Espiritú Yă Ndiǒxí.

47 Te tée díhna nuu nǎ xíndecu ñuyíú-a chi ñuhu ní cadúha ñaha Yă Ndiǒxí xii-dé, te tée-án cúú-dě ndíi Àdán, te ìngá tucu tée ní cuuⁿ-dé andiu te tée-án cúú-dě Xítóhó Jesucristú.

48 Te nchaa ñáyiu càa yìqui cuñú-yu dǎtná cáa yìqui cuñú té Àdán tée ducaⁿ nǎ cuáha ñuhu-án, te nchaa ñáyiu ní nduu táhú cundecu ndìhi tée ducaⁿ vëxi cuuⁿ andiu-án, ñáyiu-án nduu yìqui cùñú-yu dǎtná cáa yìqui cuñú ní nduu táhú-dě ndécú ndìhi-dé vitna, te tée-án cúú-dě Xítóhó Jesucristú.

49 Te nchaa ñáyiu ñuyíú-a càa-yu dǎtná-ni càa datná-ni ndùu tée ducaⁿ nǎ cuáha ñuhu-án. Te nchaa nchoo ñáyiu ní nduu táhú cundecu ndìhi tée ducaⁿ vëxi cuuⁿ andiu-án nduu-o dǎtná-ni càa datná-ni ndùu tée-án tucu.

50 Te nchòhó ñáyiu ndècu ndìhi-í ichi Xítóhó Jesucristú càchí tnúhu-í xii-ndo sǎ ncháá nàcuáa càa yìqui cuñú ñáyiu xíndecu vitna vá sáa-xi cundecu-xi núú ndécú Yă Ndiǒxí táxí tnùnigá, chi ñuyíú-a ndìhi nihnu-xi. Dico sá tàú-xi sáa núú ndécú-gă táxí tnùnigá xìni ñuhu-xi cuu-xi sá cùdǐi cundecu.

51 Te na càchí tnúhu-í xii-ndo ñⁿ tnúhu sá yíyùhu ní cuu: Dava-o cùú-ó te dava-o cùndecu-ni-o, dico nchaa-o nàdáma yìqui cuñú-ó.

52 Te uuⁿni ducaⁿ nàdáma yìqui cuñú-ó òré cáháⁿ ñⁿ cútú, te cútú-ǎⁿ cǎháⁿ-xi òré sa ta cùyatni naa

ñuyíú. Te òré cáháⁿ cútú-ǎⁿ te ndoto nchaa ñáyíu ní xíhí ñáyíu ní xíndecu ichi Xítóhó Jesucrístú, te ducaⁿ te vá ííⁿ ndùu ííⁿ quíú-gǎ cuú-yu. Te nchaa ñáyíu ndècu vívú te nàdáma yìquì cuñú-yu tnàhá-yu.

53 Te nchaa yìquì cuñú ndécú ndìhì nchaa ñáyíu ndècu ñuyíú-a vitna ñá túú cùdí-xi chi xihí-xi, dico yìquì cuñú nduu táhú nchoo ñáyíu ndècu ichi Xítóhó Jesucrístú chi cudí-xi ní caa ní quíhíⁿ chi vá cùú-gá-xi.

54 Te òré ná ndùu táhú-ó yìquì cuñú sá dúcáⁿ cùdí ní caa ní quíhíⁿ-áⁿ, te vá cùndècu ndìhì-gá-ó yìquì cuñú sá ñá túú cùdí. Te dàvá-áⁿ te quee ndáá-xi nàcuáa càháⁿ-xi núú tütú Yǎ Ndiǒxí núú càchí-xi: “Vitna ñá túú-gǎ xihí ñáyíu chi mee-nǎ Yǎ Ndiǒxí cúnù-gá táxí tnùnì ñáhá-gǎ xií-yu.

55 Te ñá túú tnàhí-gá ná ndoho ñáyíu sá cuendá tnúhu xihí, chi vá cóó-gǎ tnúhu xihí”, duha càchí-xi núú tütú Yǎ Ndiǒxí.

56 Te cue ñáyíu ndècu ndìhí-yu tnúhu sá sánú ichi ñaha xií-yu nàcuáa cadá-yu cundecú-yu dico uuⁿ-gá quidè-yu nchaa sá cuèhé sá dúhá. Te sá cuendá nchaa sá cuèhé sá dúhá quidè-yu-áⁿ, te xíáⁿ ní ngúndecu tnúhu xihí dándòho ñaha-xi xií-yu.

57 Dico táxǎhu xii Yǎ Ndiǒxí chi ní taxi-gá tnúhu ndee ìní ndécú ndìhì-o sá sáá nduu te vá quínì-gá-ó tnúhu xihí, te ducaⁿ chi ndècu ndìhì-o Xítóhó Jesucrístú.

58 Te xíáⁿ nùu càháⁿ-í dóho nchòhó cue ñáyíu ndècu ndìhì-í ichi Xítóhó Jesucrístú chi ío cùu ìní ñáhà-í xii-ndo, te càháⁿ-í dóho-ndo sǎ cáncíhí-cúⁿ nihnu-ni-ndo ichi Xítóhó Jesucrístú cuèi nándì na càda ñaha ñáyíu xii-ndo sǎ cuendá-gá, te ío nducu

ndèe-ni-ndo cada-ndo chiuⁿ-gá, chi sa nàha-ndo sá ncháá chiuⁿ quide-o cuendá-gá ñá túú àúⁿ ñá cuu quide-o.

16

Nàcuáa sàcáⁿ tnáhá ñáyiú díhúⁿ

¹ Te na càchí tnúhu-í xii-ndo cuendá díhúⁿ sá sàcáⁿ tnáhá-ndó sá cúú-xí ñáyiú ñuú Jerusálén, chi diu-ni duha ní dánèhé-í cue ñáyiú xĩndecu ichi Xítohó Jesucrístú ndécú ñⁿ ñⁿ xichi distritú Gàlaciá.

² Te duha cada-ndo ndè tnahá nduu ndumìngú, te ñⁿ ñⁿ-ndo dàquee diiⁿ-ndo sacú díhúⁿ nàcuáa chĩndee ñaha Yá Ndiõxí xii-ndo ñihí-ndó cuendá òré quexìo-í te sa cundecu túha díhúⁿ-ãⁿ.

³ Te òré quexìo-í te mee-ndo cãxi-ndõ-yu núu ndèdacàa-yu sàni iní-ndó càda ndáá canehe díhúⁿ-ãⁿ quíhíⁿ ndaha ñáyiú xĩndecu ichi Xítohó Jesucrístú ndécú ñuú Jerusálén. Te cadúha-í ñⁿ úú tutú canehé-yu quíhíⁿ cuendá cutnùní iní ñáyiú ñuú Jerusálén nàcuáa ndùu chiuⁿ cuáháⁿ-yu.

⁴ Te núu xìni ñuhu-xi sá quíhíⁿ-í te candeca-í-yu quíhíⁿ.

Té Pãblú sání iní-dé quíngoto-dé cue ñáyiú ndècu ichi Xítohó Jesucrístú

⁵ Te yúhú sání iní-í yáha-í ñⁿ úú ñuú cáá dìstritú Macèdoniá, te dătnùní ducaⁿ te sáá-í núu ndécú-ndó.

⁶ Te òré quexìo-í te cudana cundecu ndihí ñaha-ĩ xii-ndo vài nduu, àdi cudana te cundecu ndihí ñaha-ĩ xii-ndo ndèé yáha nchaa yóó quidé vixiⁿ-xi. Te sátá dúcáⁿ te cada ndee iní-ndó chĩndee

ñaha-ndo xii-í òré nucúhuⁿ ichi-í te núu ndèé ichi na quìhíⁿ-í.

⁷ Te duha càháⁿ-í chi núu Yá Ndiöxí ná càchí-gá te cundecu ndihí ñaha tnàa-í xii-ndo òré quexìo-í te ñá díú dìcò-ni ichi yǎha-í.

⁸ Te cundecu-ni-í ñuú Éfesú-a ndéé tnahá vico Pentecòstés.

⁹ Te ducaⁿ chi iha ío tédóho ñáyiú tnúhu Xítohó Jesucristú sá càháⁿ-í núǎ-yu. Núu xiǎⁿ ío váha quèe cuendá cada-í chiúⁿ-gá cuèi ío vài ñáyiú ñá túú tnàhá iní-yu sá càháⁿ-í tnúhu-gá.

¹⁰ Te núu na quìxi coto ñaha té Timùteú xii-ndo, te ío váha cuu iní-ndó càháⁿ ndihí-ndo-dě cuendá ducaⁿ ñà túú ñǎ caní iní-dé cundecu ndihí ñaha-dě xii-ndo, chi tnàhá-dé cúú-dě téé quide chiuⁿ Xítohó Jesucristú dàtná quídè-í.

¹¹ Te cuiní-í sá nì ìⁿ-ndo vá caní cuèhé iní-ndó cuendá-dé, te chindee-ndo-dě nàcuáa cuu váha iní-dé òré quixi-dé quixi coto ñaha-dě xii-í, chi yúhú ndihí dava-gá ñáyiú ndècu ichi Xítohó Jesucristú ndétú-ndǎ-dé quexìo-dé.

¹² Te ío ní cáháⁿ ndàhú-í núú tǎ Àpolós téé ndècu ndihí-o ichi Xítohó Jesucristú cuendá quixi-dé ndihí dava-gá cue téé ndècu ndihí-o ichi-gá quixi coto ñaha-güedě xii-ndo dico ñá túú ní cuiní-dé quixi-dé vitna, dico quixi-dé ndéé cuéé-gá.

Tnúhu ndéé núú ñǎ ndihí-ná

¹³ Te ío quìhi iní-ndó cùndecu-ndo ichi Xítohó Jesucristú, te vá dáñá ndèé-ndó quìndáá iní-ndó-gǎ, te ío yì cùnduu iní-ndó cùndecu-ndo ichi-gá, te ío nducu ndèe-ndo canchicúⁿ nihnu-ndo ìchi-gá.

14 Te ío váha cuu iní tnáhá-ndó, te ducaⁿ ïo váha cada tnàha-ndo te núu nándi cùu sá vâha sàni iní-ndó càda-ndo.

15 Te nchòhó ñáyiú ndècu ndihí-í ichi Xítohó Jesucrìstú sa nàha-ndo sá ðihnanuu cuè ñáyiú cùu ndi mee té Èstéfanás ndécú ðìstrítú Acâyá ní sándáá iní-yu tnúhu Xítohó Jesucrìstú. Te vitna ñá túú dàña ndeé-yu quidé-yu sá vâha sá cúú-xí dàva-gá ñáyiú sándáá iní tnúhu-gá.

16 Te càháⁿ ndàhú-í núú-ndó sã quíndáá iní-ndó nchàa ñáyiú ducaⁿ xíquide, ndihí nchaa dava-gá ñáyiú ío ndùcu ndee quide chiuⁿ ndihí-ndo cuendá Xítohó Jesucrìstú.

17 Te ío cùdíí iní-í sá ñí quexìo té Èstéfanás, ndihí té Fortunátú, ndihí té Acàicú, chi cue téé-áⁿ ñí quide-güedé núú-ndó ñí quide-güedé nchaa sá ñà túú ndàcu-ndo cada-ndo cuendá-í ní cùu.

18 Te ío tàxi-güedé tnúhu ndee ìní xii-í, te ðiu-ni ducaⁿ tàxi-güedé tnúhu ndee ìní xii nchòhó tucu, te núu xíãⁿ xíní ñùhu-xi sá cánèhe-ndo sá yíñùhu núu nchàa cue téé duha xíquide váha.

19 Te nchaa ñáyiú xíndecu ichi Xítohó Jesucrìstú ndécú ðìstrítú Àsiá quide ndee iní ñáhã-yu xii-ndo, te ío cada ndee ìní-ndó càchí té Àquilú ndihí ñadìhí-dé tá Priscilá, te ducaⁿ quide ndee iní ñáhá tùcu nchaa ñáyiú tàcá dácuàha tnúhu Yá Ndióxi vehé-yu xii nchaa nchòhó ñáyiú ndècu ichi-gá.

20 Te cada ndee ìní tucu-ndo càchí cue dava-gá ñáyiú ndècu ndihí-o ichi Xítohó Jesucrìstú. Te ñi yùhu ñi iní-ndó càda ndee iní tnáhá-ndó ìíⁿ ìíⁿ-ndo.

21 Te vitna ndaha mee yùhú té Pãblú téé-í tnúhu-a quide ndee iní ñáhà-í xii-ndo.

²² Te ñáyiú ñá túú cùu váha iní-xi núú Xítohó Jesucrístú te na cuíta nihnú-yu. Te vitna nchaá-o chǐ ná càchí-ó sǎ Xítohó Jesucrístú quixi tucu-gá.

²³ Te xìcáⁿ táhù-í núú Xítohó Jesucrístú sá ná chìndee chítúu ñaha-gǎ xii-ndo.

²⁴ Te ío cùu iní ñáhà-í xii-ndo nàcuáa ndècu-o ichi Xítohó Jesucrístú, te ducaⁿ na cùnduu, te ío chí cádá ndèe iní-nǎ vitna.

Tnúhu ní cáháⁿ yǎ ndiǒxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

872f7754-0986-5ecd-a059-925a708a6939